

Akayëta and Andodakel aṅ Lilaya in

Ar yëgwëk akayëta aṅo an Šaṅ këno wăcënd. Bend kë ñatëgu ecan ecan gër ngwën beṅ yëgw ko ang wăsindëra baṅo Axwën Yesu ak. Eni kemënaxën gër ekwëta yëgwënaxën babi okëreceṅ ok gayik asoro bani sorond në end Yesu Kërisët. Amëd aṅo, anëyali banëbi nëyalind bela bën eno calend Emun end Bërom eṅ, bari abani wă na eni di mondako. Akayëta aṅo kë sëyalind mëne Kaxanu afenin fenin këbi bacosa bakëbënaxik bër kë xemënalind ekwëta ed xwëta këno bën, do gë bër kënebi lawëra në end andiyen andexëm bën. Er ex gër akayëta in:

Ecëma ed bamara banjongëbaki el: 1.1-8.

End owun or Kaxanu do gë or Axwën Yesu eṅ: 4.1-5.14.

End beñigënaxik benjongemat do gë bulunda iwënëk eṅ: 6.1-7.17.

End eñigënaxik enjongekinëm do gë okerelon ocongibat eṅ: 8.1-9.21.

End ikayëta ind meleka do gë otede oki eṅ: 10.1-11.19.

End Sindan do gë bulunda ir Kaxanu eṅ: 12.1-18.

End bandixa band bemacar eṅ: 13.1-18.

End oyëkan or bëwënëk do gë kiti ind kë yowënd eṅ: 14.1-20.

End beñigënaxik do gë betëm eṅ: 15.1-16.21.

End kiti ind bër këjo wërelind Kaxanu eņ: 17.1-19.21.

End owun or bëniy wëli eņ: 20.1-6.

End kiti ind şabucara do gë ind bëşësëk eņ: 20.7-15.

End ngwën ingaşax do gë omakaw ond Yesu eņ: 21.1-22.21.

Lilaya in

¹ Gër akayëta aņo ex bendey bend nangën këjo Yesu Kërisët në ofakeli Şaņ, ariyenin arexëm beņ, and lawënëgu këjo meleka irexëm gër ndexëm aņ. Kaxanu nangën baņo beņo ebi tëfëtanaxën bëriyenin bërexëm bën eni nangaxën mène gogo kë ñatëgu.

² Ata Şaņ ex ar reyak osede olo an, gë đek bend wat baxo beņo, do Yesu Kërisët rek mène eyeyan ed đal ed Kaxanu dëņ ex.

³ Nëngandëralebî, ar kë fënënd an, gë bër kë baxëtënd, do kë sëfënd eyeyan ed xaniwëk gër Kaxanu bën gayikwa gogo kë ñata.

End bamara banjongëbaki eņ

⁴ Wëno Şaņ këņun yëgwënëlınd wën bërëwãk bër ex gër bamara banjongëbaki band gër ebar ed Asi bën. Ar hik, hi bax do ko yelind an, yëlëleņun oyekax ol do gë obetak ol. Bangoc banjongëbaki band ex gër lëngw ir añëpara and owun orexëm baņ,

⁵ do gë Yesu Kërisët, mëņ ar ex sede ir mokwëta an, aņanar ar xanik gër ecës an, do emun end bemun bend gër ebar ro eņ, yëlëlenun oyekax ol do gë obetak ol!

Yesu Kërisët, mëŋ ar ñan këbo, racët këbo gër beñëŋenax bendebi gë oşat orexëm an,

⁶ do ar ñar këbo hi këne gër owun orexëm an, ar ri këbo bëşadaxan bër Sëm irexëm Kaxanu an, xwënëk din ir din enjaran eŋ do gë panga in! Amen!

⁷ Nëkoyino ga ko fedawënd gë ñarar ñar: Ala ar ex yo awat këŋo wat, ado bër xwëş ñar bën dëŋ awat këno wat do dek benëŋ bend ex gër ebar ro beŋ, arenita këni ñana eni denitand në endexëm. Iyo, amen!

⁸ Ata Axwën Kaxanu re ko: «Wëno ex ayanar an, wëno ex afelatar an. Wëno ex ar hik, hi bax do kë yelind an; wëno ex ar xorëk beŋ dek an.»

End ecanaya ed Axwën Yesu eŋ

⁹ Wëno Şaŋ, abaŋe irewën hi këme, ga ñar këne gër toro, gër owun do gër ekemënali ed end Yesu Kërisët. Gër oşir or këni wacënd Patëmos hi bame gayik afemëra këme femërand eyeyan ed Kaxanu eŋ, do ga këme reyarand osede or Yesu eŋ.

¹⁰ Ata fedaw ko Angoc Amënëk aŋ gër ndam, yatir oganjar. Wël këme oniŵ ang ofarix or kereloŋ fo gand epoy edam

¹¹ ga kë re: «Er këy watënd in, ñëgwël në akayëta do ey dawëneli gër ñamara ñanjongëbaki ñar: Efes, gë Sëmirën, gë Perëgam, gë Catir, gë Sarëd, gë Filadelëfi do gë Lawodise.»

¹² Ata ga şena këme mowat ar baxe yeyanelind mondako an, wat këme ofambo od kaŋe.

¹³ Do mërëxand ir odambo oko, wat këmo ar ang asëñiŵ ar ala. Er şudfa baxo ocuđ od gëşec do xapa baxo apëxw and kaŋe gër emëkw.

¹⁴ Omban ond gër gaf irexëm oŋ feşëk ang gwëtene fo, ang okëbina fo, do bangës baŋ kē ŷegënd ang eñan fo.

¹⁵ Osapar orexëm oŋ kē watind ang yawale ir fëtëk nē angodux fo, do oniŵ ol kē rëmënd ang oŷëm fo.

¹⁶ Ala ajo, lëkaya ko gër ataxan and liŵ oŵal ocongoxi, gër etëŷ edexëm şanëguk duxuma ir fëco aňak fëco aňak, do dëxas in kē ŷegënd ang eñan gē dek panga indexëm ak.

¹⁷ Ata ga këmo nëkon, wëc këme kërud gër osapar orexëm. Ata hëmba ke gē ataxan and liŵ aŋ do re ko: «Kërey yëdara na! Wëno ex aŷanar an, wëno ex afelatar an,

¹⁸ wëno ex abëngw an. Aşës şës bame barikan gërëgako abëngw eme din ir din. Wëno lëkayak bacoketaya band ecës, do gē band wur ir bëşësëk baŋ.

¹⁹ Awa ñëgwël de er wat këy in, gē er ex in do gē er kē bëtëgu in.

²⁰ End oŵal ocongoxi or wat key gër ataxan and liŵ andam eŋ do gē end odambo ocongoki od kaŋe eŋ cëŋ, nëkod er ŵacayak in: oŵal ocongoxi oŋ exëni bëlaŵënel bër hik gër bamara banjongëbaki bën do odambo ocongoki ok ex bamara banjongëbaki baŋo.»

2

Kayëta ir Amara and Efes in

¹ Ñëgwënëlo arolawñen ar ex gër Amara and ex gër Efes an:

«Baxëtël er ko rend ar lëkayak ował ocongoxi gër ataxan and liw irexëm in, ar kë yexërand mërëxand ir ofambo ocongoki od kañe an.

² Anang nang këme bandixa bandey bañ, andiyen andey añ do ang xemëna këy në endam ak. Anang nang këme mëne wëj ayëbi bujanënd na bësëmbak bën, bëte ari ri këyëbi atëy bër kë rend oparëxanda hi këni bën, ata sëk këyëbi mëne bënëgwëš exëni.

³ Wëj mobuñ a buñ a këy, motoro soro këy në end oñac oram, bari axi cena ex na.

⁴ Barikan wëno emat fo şuseli këmi: ga seb këy ebal edam el ang baxi balënd gër ñanar ak.

⁵ Kwital gër ed xëyëtayaw këy. Nëngwëtal ex ola orey ol do bakanël bandixa bañanar bandey bañ. Angëmëne ay nëngwëta ex na dek dek, ata këmi yenëli, mi kan lambo irey in gër ed xwët këy.

⁶ Barikan añaneli ñaneli këmi ga şus këy bandixa band bër eng a end Nikola bañ, ang şus këme wëno ak.

⁷ Awa ar gë anëf an baxëtëlexo de end këbi felënd Angoc and Kaxanu bër ex gër bamara eñ! Ar kë xor an, ayël këmo yël exo yamb odëwëreñwen od atëx and aniyen and hik gër arayen ok, gër ed exo Kaxanu.»

End kayëta ir Amara and Sëmirën eñ

⁸ Ñëgwënëlo arolawñen ar ex gër Amara and ex gër Sëmirën an:

«Baxëtël er ko rend ar ex aÿanar do afelatar in, ar sês bax do xani ko gër ecës an.

⁹ Anang nang këme toro indey in do gë oxaÿën oreÿ ol (xarak wëj ar gë napul hi këy!) Anang nang këme ang këni renarand ak bër kë rend Bëšëwif exëni, xarak ani gi ex na Bëšëwif: amara and Sindan exëni.

¹⁰ Toro ind ki wëcan in, kërey cam na. Şabucara in wa kë ri enëbi tëra bërëmar gër ndewën na do enëbi mëla gër epëra. Mondako këñun hi atëÿ, do en toro bakey epëxw. Kemënal gër ekwëta ed xwëta këye xali gër ecës, ata këmi şos gë aniyan and din añ.

¹¹ Awa ar gë anëf an, baxëtëlexo de end këbi felënd Angoc and Kaxanu bër gër bamara eñ. Ar kë xor an, kërexo yëda na ecës ekinëm el.»

End kayëta ir Amara and Perëgam eñ

¹² Nëgwënëlo arolawën ar ex gër Amara and ex gër Perëgam an:

«Baxëtël er ko rend ar lëkayak duxuma ir fëco añaak fëco añaak in.

¹³ Aye nang këme mëne gër ed lëg këy hik añaëpara and owun or Sindan añ. Barikan wëj alëka lëka ki oñac oram ol do abayi bayi këy ga xwëta këye. Ado abayi bayi këy ga xwëta këye gë bakey band law këno gër ndewën na Añëtipas, sede iram ir xwëta bamo bañ in, fën gër ed lëg ko Sindan.

¹⁴ Barikan wëno bendey exëna bend şuseli këmi: ga xwëtaya këyëbi bër kë sëfënd osëyali or Balam bën. Mëñ ex ar sëyali baño Balak mondake këbi lënan eñëñëx Bëÿisërayel an.

Ga šoñ babi wa eni yamb ŷas er oyel or řaš kënëbi gër olaš eŋ do eni kwënda asëk alakirand fo in.

¹⁵ Axwëtaya xwëtaya këyëbi bëte bela bër sëfëk bend këni sëyalind bër enga end Nikola bën.

¹⁶ Awa gogo këmi yenëli angëmëne ay nëngwët ex na ola oreŷ ol. Do bela bëjo aŵereli këmëni wëreli gë duxuma ir kë šanënd gër etëŷ edam in.

¹⁷ Awa ar gë anëf an baxëtëlexo dë end këbi felënd Angoc and Kaxanu bër gër bamara eŋ!

«Ar kë xor an, ayël këmo yël eyamb ed šonayak do këni wăcënd man el. Ayël këmo yël bëte ekaŷ epešax ed gër ed ŷëgw këni oŵac onëngwët el. Oŵac olo ar yël këno an fo kë nangënd, ax gi ex na ala ašëxe.»

End kayëta ir Amara and Catir eŋ

¹⁸ Nëgwënëlo arolawën ar ex gër Amara and ex gër Catir an:

«Baxëtël er ko rend Asëñiŵ ar Kaxanu in, ar gë bangës band ang xodux or xafa-xafa an do ar gë osapar or kë ŷegënd ang yawale ir lëxw këni gër xodux an.

¹⁹ Anang nang këme bandixa bandey baŋ, gë aŋana andey aŋ, gë ekwëta edey el, gë andiyen andey aŋ, do gë ebuŋa edey el. Anang nang këme bëte mëne bandixa bandey band gërëgako baŋ ŷëmbëk gë bañanar baŋ.

²⁰ Barikan emat fo ex end šuseli këmi eŋ: ga xwëtaya këyo Isabel, asoxari ar kë rend alawënel hi ko an. Xarak në enambeli ebi bëriyenin bëram bën ga këbi sëyalind eni

kwända asëk alakirand fo in, do eni yambënd
ÿas er oyel or ñaâ kënëbi gër olaâ eñ.

²¹ Asebën sebën këmo amëd exo nëngwëtaxën
dek dek ola orexëm ol, bari año ñandi ex na exo
teb asëk alakirand fo in.

²² Wëno ošëxwëra or këño ren në angaw̃ këmo
lapan do eni toro mbañ mēj gē bër këni rind
orekar bën. Angëmëne anëngwët nëngwët këni
ola orebën ol do eni teb beño, abi gi na eño.

²³ Alaw̃ këmëni law̃ obaâ orexëm ol eni
nangëraxën dek bamara bañ mēne wëno awat
këme watënd er ex gër yomb ir ala in, do gē er
ex gër emëkw in: banjëlan bañ do gē oñandi ok.
Do awaâ këmo wãâ ala kala er riyeni ko in.

²⁴ Barikan wën dek bër bayik na gër Amara
and Catir, bër ax tēf ex na osëyali osëmbak olo
bën, din an cala ex na en nang bend këni wacënd
“Beconëšon bend Sindan beñ”. Ga re këme,
edëbi ecëxe amun dëbin na.

²⁵ Barikan fo er šot kën in, dëkayayin aye xali
me yeli.

²⁶ Ar kë xor an, ar lëkayak andiyen andam xali
gër eñata an, ayël këmo yël owun ol gër
benëng dek.

²⁷ Gē xwëlekwële ir owun ir ex dun këbi ÿana
ebi kadacënd

do ang këni nëtënd ofeya fo këbi ÿana ebi
nëtënd.

²⁸ Ang yël ke Faba owun ak, ar kë xor an ayël
këmo yël wëno bëte amal and oxeya añ.

²⁹ «Awa ar gē anëf an, baxëtëlexo de end këbi
felënd Angoc and Kaxanu bër gër bamara eñ!»

3

End kayëta ir Amara and Sarëdes eŋ

¹ Ñëgwënëlo arolawëŋ ar ex gër Amara and Sarëdes an:

«Baxëtël er ko rend ar gë bangoc banjongëbaki band Kaxanu in do ar lëkayak ował ocongoxi an: Anang nang këme bandixa bandey baŋ; aye nang këme mëne bela bën ašëkw këni šëkwënd ga këni yëland abëngw ey xarak ašësëk ey.

² Perënal do kemënindebi bër kë re ex cës bën. Awat wat këme mëne bebër këy rind bën ax gi ex na šenene gër ogës od Kaxanu, mëŋ ar xwën ke an.

³ Kwital ang wël këy do wã këy eyeyan ed Kaxanu ak. Kwëtayal do nëngwëtalex dek dek aniyän andey aŋ. Ang arek fo këme yeli, Angëmëne ay perëna ex na. Ay nang na apëxëd and fe këme yeli mi pënga.

⁴ Barikan bërëmar gër Amara and Sarëdes na, ani buyarën ex na banjëm bandebën baŋ. Bën banjëm bapešax baŋo këni šuđa ang wëno ak mi tëfëraxën gayik aŋap ŷap këbi.

⁵ Ata ar kë xor an mondako këno šuď banjëm bapešax. Ował orexëm ol din ŷëgw këme, ame pëxwëc na gër akayëta and aniyän. Ował olo, afel këmëni fel Faba Kaxanu, do gë omeleka odexëm ok.

⁶ Awa ar gë anëf an, baxëtëlexo de end këbi felënd Angoc and Kaxanu bër gër bamara eŋ!»

End kayëta ir Amara and Filadelëfi eŋ

⁷ Ñëgwënëlo arolawëŋ ar ex gër Amara and ex gër Filadelëfi an:

«Baxëtël er ko rend Awënëk in, ar dal an. Ar lëkayak acoketaya and Dafid an. Ar kë fërëtënd do ala ax kor na exo përa an; ar kë fërand do ala ax kor na exo përet an:

⁸ Anang nang këme bandixa bandey bañ. Afërëtën fërëtën këmi ebët ed ala ax kor na exo përa el. Gayikwa wëj alëkaya lëkaya këy eyeyan edam el ado bayik axi ñëmb ex na ojaw ok. Ay yaxëta ex na oñac oram ol.

⁹ Ayël këmi yël bër gër amara and Sindan bën, bër kë rend Bëšëwif exëni xarak ani gi ex na Bëšëwif: anëgwëš këni rind. Wëno kë ri eni yeli, eni poxi gër osapar orej, do eni nang mëne añan ñan këmi.

¹⁰ Gayikako aña wã këy ga re këme ey buña gër toro, wëno dëñ ki xaxa këdi ki wëcan toro ind kë yowënd gër ngwën in, efi dixën atëy dek bela bër gër ebar ro bën.

¹¹ Wëno gogo këme yeli. Dëkayal aye er šot këy in, këdi ki xan ala acosa and angora añ.

¹² «Ar kë xor an, xëcar ko hi lëf gër Aciw and Kaxanu, bëte din axo can na. Gër mëñ xëcar ijo këme yëgw oñac or Kaxanu ol, gë or angol andexëm ol do gë oñac onëngwët oram ol. Angol año ex Yerusalem ixašax ir kë xaniw gër Kaxanu, elod yañ gër orën in.

¹³ Awa ar gë anëf an, baxëtëlexo de end këbi felënd Angoc and Kaxanu bër gër bamara eñ!»

End kayëta ir Amara and Lawodise eñ

¹⁴ «Ñëgwënëlo arolawën ar ex gër Amara and ex gër Lawodise an:

«Baxëtël er ko rend ar ex däl in, ar ex sede ir mokwëta enim an, ar ri këni gë Kaxanu ngwën an:

¹⁵ Anang nang këme bandixa bandey bañ. Awat wat këme mëne wëj ay yem ex na, ay yëka ex na. Ndakan ey yemëdo wa, ba ey yëkado wa!

¹⁶ Gayikako mërëxand fo hi këy, ay yem ex na, bëte ay yëka ex na, asëp këmi sëp. Ay bo na gër etëy edam.

¹⁷ Awa gayikako are këy rend: “Yama wëno ar gë napul an nde, anëka beta këme, obal axe gi ex na.” Bari wëj dëj ay nang ex na mëne anëka xata ki, ar moñaw ey, axaÿënaxik ey, ašiwëk ey do ar tëb gë eman ey.

¹⁸ Mëj këmi felaxënënd ey yow ey yëc kañe ir wënën këme gë xodux in, ey gixën ar gë napul. Yow ey yëc banjëm bapešax, ey gixën ar šudarak, mëj këy rëxëtaxën ašëfën ir tëb gë eman in. Bëte yow ey yëc bëšan bër këy xoš gër bangës ey watëraxën.

¹⁹ Wëno, dek bër ñan këmëni bën arexëra këmëni rëxërand, bëte awërešët këmëni wërëšëtënd. Awa kemënal gë emëkw edey el dek, do nëngwëtël aniyän andey añ!

²⁰ Awël nde, wëno gër ebët xwëša këme do këme sëmbënd. Angëmëne ala exe wël do exe përetën ebët el, alil këme lil mi yambëra, wëno gë mëj, do mëj gë wëno.

²¹ «Ar kë xor an, axetëna ke xetënađ gër añëpara and owun oram, ang xor këme wëno do xetëna këmo Faba Kaxanu gër añëpara and owun orexëm ak.

²² «Awa ar gë anëf an, baxëtëlexo de end këbi

felënd Angoc and Kaxanu bër gër bamara eŋ!»

4

End añëpara and owun or Kaxanu eŋ

¹ Ga xucak eŋo, wat këme fol ebët yaŋ gër orën. Ata wël këme ang ofarix or kereloŋ fo, oniŵ or ar yeyaneli baxe gër ŷanar ol ga kë re: «Yow yaŋ ro, mi masin bënd kë fiatëgu ecan ecan beŋ.»

² Ataŋ, Angoc Amënëk aŋ fedaw ko gër ndam. Wat këme añëpara and owun yaŋ gër orën, do ala ga ŷëpaxën ko.

³ Ar ŷëpak an ko watind jing-jing ang ekaŷ ejekax ed këni ŵacënd ŷasëp do gë ed sarëdëwan fo. Do ŷandiŵ in ga fëlëk añëpara and owun aŋ kë watind kal-kal ang ekaŷ ed emërod fo.

⁴ Ata xwët këni jey gër añëpara aŋo, bañëpara band owun alapem gë banax. ŷëpaxën këni bëxarëk alapem gë bënëx ga ŷudfaraw këni banjëm bapeŷax do ŷëxwaw këni oxamote or kaŋe or owun.

⁵ Ata gër añëpara and owun and mërëxand kë wingarand, kë wëlind odiŵ, do gë bongëbër bond ekëman. Paŷ gë añëpara aŋo kë hōband odambo ocongoki od ex bangoc banjongëbaki band Kaxanu ok.

⁶ Gër lëngw ir añëpara and owun aŋo bëte hik anjer, and kal-kal, ang anangoye fo.

Ler gër añëpara aŋo, xwëŷara këni bebëbëngw bebënëx, bëjo mërëxand, bëjo jey, do hi këni yer bangës fo: baŋo gand lëngw, baŋo gand epoy.

⁷ Ebëngw eřanar in hi ko ang yëraŋ fo, exinëm in ang engas fo, esasën in ang dëxas ir ala fo, do enaxën in ang šambat ir kë šëgënd fo.

⁸ Beëëbëngw beëënax bëjo hi këni ala kala gë obafe ocongibat, do eman eŋ yer řangës fo: amëlëfëlëf do gë amëfacëfac. Ciš wec këni řëwërand mondako:

«Awënek, Awënek, Awënek exo Axwën Kaxanu, mëŋ Ar xorëk beř dek an,

mëŋ ar hi bax, hik do ko yowënd an!»

⁹ Do beëëbëngw bën, and këno yasënd ar řëpak gër añëpara and owun në end enjaran, do gë or gapak orexëm eŋ, do and këno šëkwënd aŋ, ar kë liyand din ir din an,

¹⁰ bëxarëk alapem gë bënax bën eni poxi gër lëngw ir ar řëpak gër añëpara and owun an, ar kë liyand din ir din an. Do sam eni cëxwëta oxamote or owun orebën oŋ eni kwët gër lëngw irexëm, do eni dend:

¹¹ «Ařap řap ki Kaxanu, wëj Axwën areři an, wëj xwënek enjaran eŋ,

or gapak ol do gë panga iŋ,

wëj rik dek beř bën,

gayik ařandi řandi ki rixën këy dek beëër hik bën.»

5

End anobo do gë akayëta eŋ

¹ Ata gër ataxan and liw and ar řëpak gër añëpara and owun, wat këme akayëta. Oñëgw ok er hi bax oko amëlëfëlëf, oko amëfacëfac.

Asabinan sabinan bani ßapakëta ßanjongëbaki gër akayëta aŋo gë ßañolo ßand fëtën bani*.

² Wat këmo bëte meleka ir fangak mbaŋ, ga ko fem mondako: «Noŋo wa ŷap këŋo exo ðaramët ßañolo ßaŋ do exo ðëkwët akayëta aŋ?»

³ Bari ala aŋo ñap bana exo ðëkwët akayëta aŋo do exo wat oñëgw ok: ax gi ex na gër orën, ax gi ex na gër ebar, ax gi ex na gëd gër ebar.

⁴ Ata wëno këme sesënd mbaŋ gayik ala aŋo ñap bana exo ðëkwët akayëta aŋ do exo wat oñëgw ok.

⁵ Barikan axarëk abat re ko: «Tebël otes ok, yëraŋ ir gër ekun ed Yuda in, arandëwëra ar Dafid an, ŷap këŋo. Axor ko xor exo ðaramët ßañolo ßaŋ, ßapakëta ßanjongëbaki ßaŋ, do exo ðëkwët akayëta aŋ.»

⁶ Ata gër ed hi bani ar ŷëpak gër añëpara and owun an, gë bëbëbëngw bëbënax bën, do gë bëxarëk bën, wat këmo mërëxand anobo nangëde añaș ñaș bano fo. Wat këme gër anobo aŋo ofarix ocongoxi do gë ßangës ßanjongëbaki ßand ex ßangoc ßanjongëbaki ßand këbi lawëndërand Kaxanu ðek ebar ßaŋ.

⁷ Anobo aŋ ye ko xana ko akayëta aŋ gër ataxan and liw and ar ŷëpak gër añëpara and owun.

⁸ And xana ko akayëta aŋ, bëbëbëngw bëbënax bën, do gë bëxarëk alapem gë bënax bën lapaya këni mopoxi gër lëngw ir anobo. Ala kala lëkaya ko emangi, do gë angalama and kaŋe and ŷëmën bani gë așururu ir xwëșëna bani gë

* **5:1 5.1** Mondako bani fërand ßapakëta ßaŋ and këni lëkw aŋ këdi ko lëkwët ala.

angiri. Ašururu ijo w̃acayak cale ind bulunda ir Kaxanu iŋ.

⁹ Do ga kēni yēw̃ oyēkan oxašax kēni rend:

«Wěj ŷap ki ey kana akayēta aŋ,
Wěj ŷap ki ey d̃aramēt bañolo baŋ.
Gayikwa añaš ñaš bani šadaxa,
racētaxēn kēyēbi gē ošat orey oŋ
bela b̃er enēng end ex yo,
bela b̃er eyeyan ed ex yo,
bulunda ir ex yo
ebi kwēnaxēn Kaxanu.

¹⁰ Wēj racēt kēbi eni gi b̃er Kaxanu ir xwēn kēbo,
b̃er owun ob̃at, b̃ešadaxan do eni bēña ebar el
dek.»

¹¹ Bēte ga kēme nēkon, wat kēmēni
bebēbēngw bebēnax b̃en do gē b̃exarēk alapem
gē b̃enax b̃en ga xeta kēni añēpara and owun
aŋ. Wēl kēme od̃iw̃ od omeleka ok ang exēni
owaxe owaxe ak.

¹² Er bani xeŷēnd:

«Anobo and ñaš bano šadaxa aŋ ŷapēk
exo kwēn panga iŋ, gē napul in, gē orenik ol,
gē ojaw̃ ok, gē or gapak ol,
gē enjaran eŋ do gē obetak ol.»

¹³ Bēte dek b̃er hik yaŋ gēr orēn b̃en, b̃er gēr
ebar b̃en, b̃er gēd gēr ebar b̃en, b̃er polo gēr
angwēngw b̃en do b̃er gēr ed hik yo b̃en, awēl
bamēni wēlēnd ga kēni re:

«Ar yēpak gēr añēpara and owun an do gē anobo
aŋ,
xwēnēk obetak ol do gē or gapak ol,
enjaran eŋ, do gē owun ol din ir din!»

¹⁴ Ata beβëbëngw beβëanax bën këni yakand: «Amen!» Bëxarëk bën foxi këni enëβi cale.

6

End edëkwët ed ikayëta eŋ

¹ Ata wat këmo anobo aŋ ga laramët ko aňanar ikayëta ind lëkw bani do laram bani gë baňolo βakëlëbëd banjongëbaki iŋ. Wël këme ang ekëman fo oniŵ or ebëngw eŋanar ol gër beβëanax ga ko re: «Yow!»

² Ata wat këmo fanac ifeŝax. Ar ŷëpaxën baŋo an lëkaya ko atumb do yël këno ekamote ed owun do ye ko ang ar xorëk fo exo korëgu bëte.

³ And laramët ko gër ed laram bani akinëm aŋ, wël këmo ebëngw exinëm in ga ko re: «Yow!»

⁴ Ata ŝanayaw ko fanac iŝëxe iwarax, ang xodux fo. Ar ŷëpaxën këŋo an yël këno duxuma iŝakax do gë ojaŵ od exo dëxëtaxën aketëxeta and gër ebar ro aŋ, eni dawëraxën βela bën.

⁵ And laramët ko gër ed laram bani atasën aŋ, wël këmo ebëngw esasën in ga ko re: «Yow!» Ata wat këmo fanac ibanax. Ar ŷëpaxën këŋo an lëkaya ko acariya and eyamb gër ataxan.

⁶ Do wël këme ang oniŵ fo mërëxand ir beβëanax bëjo ga kë re: «Acariya and bële kala, kodí keme do bacariya batas band orëŝ, atama amat and kodí. Barikan kërey nëxen na ugu oŋ do gë ngoy iŋ!»

⁷ And laramët ko gër ed laram bani anaxën aŋ, wël këmo ebëngw enaxën in ga ko re: «Yow!»

⁸ Ata wat këmo fanac ir ŷanin-ŷanin, ar ŷëpaxën këŋo an këno ŵacënd «Ecës», do këni

lanjētarand gē wur ir bēšēsēk in. Yēl kēno owun or bebēt ibat gēr owebēt onax od ebar, ebi nemin bela bēn gē duxuma in, gē enjo eṅ, gē ocēxwēra ok, do gē oŵacar or gēr apuŷ oṅ.

⁹ And laramēt ko gēr ed laram bani anjoxēn aṅ, wat kēme dila gēr angēb bēnjēw bēnd bēr laŵ kēnēbi nē end ga lēkaya bani, do bani reyarand osede or Kaxanu bēṅ.

¹⁰ Axeŷ bani xeŷēnd mondako: «Axwēn, wēj aŵēnēk an, do wēj ar dal an, xali niŷe wa kēy šēni eyēbi kitixēn bela bēr gēr ebar ro bēn? Xali niŷe kēyēbo ŵašan bēr laŵ kēbo bēn?»

¹¹ Ata yēl kēnēbi ala kala acud' apešax do fel kēnēbi eni cēni tēkēr xali eni ṅatēgu dek bēcandaŵ bēnd gēr andiyen and Kaxanu bēṅ, do gē dek bēmaŷe bēndebēn bēnd kēnēbi laŵ ang bēn ak bēṅ.

¹² Ata and laramēt ko gēr ed laram bani anjongamatēn aṅ, wat kēme andēgēl and ebar atēm. Eṅan eṅ banēngēk gim-gim, ang anjēm amanax fo facaw in dek warēk wiridid', ang ošat fo.

¹³ Oŵal oṅ xwēcētarawēk gēr orēn ang ondan ond wininēk ekoc etēm fo, do wēcēguk gēr ebar.

¹⁴ Orēn ol lēkwayak ang kēni lēkwēnd akayēta fo, osēnd oṅ do gē ošir oṅ rēxētak gēr ed hi bax.

¹⁵ Bemun bēnd gēr ebar ro bēṅ, bēr gapak bēn, gē bēlēngw bēr ocoroda bēn, gē bēr gē napul bēn, gē bēr gē ojaŵ bēn, gē okadēp ok dek, gē bēr ax gi ex na okadēp bēn ŷafēra kēni gēr okel do gēr bangaŷ band gēr osēnd.

¹⁶ Do gēr ed ŷafēra kēni, kēni felēnd osēnd oṅ do gē bangaŷ baṅ: «Wēcāninēbo, coninēbo caw,

këdi këbo wat ar ÿëpak gër añëpara and owun an, këdi këbo wëcan oxoÿ or anobo ol.

¹⁷ Gayikwa akey atëm and oxoÿ orebën aŋ, anëka ñatëguk, do noÿo këŋo fece?»

7

End bulunda ir Kaxanu eŋ

¹ Ga xucak eŋo, wat këmëni omeleka onax ga xwëšara këni gër owebët onax od ebar. Bën sëra bax oxoc onax or ebar oŋ këdi kë xoc, ax gi ex na gër ebar, ax gi ex na gër angwëngw, ax gi ex na në atëx.

² Ata wat këmo gand apën-eñan meleka išëxe ga ko šëg end orën eŋ. Er lëkëya baxo nanganëme ir Kaxanu in, mëŋ ar ex abëngw an. Ga ko xeÿ këbi rend omeleka onax od šëñëta babi eni nëxen ebar el do gër angwëngw ok:

³ «Këren dinan na eñëŋenax ebar el, gë angwëngw aŋ, gë batëx baŋ, xali mëni paÿ edin ed nanganëme el gër eyiÿ bëriyenin bër Kaxanu, mëŋ ar xwën këbo an.»

⁴ Ata wël këme yëgwe hi bani bër gë nanganëme bën: owëli këme gë ofëxw onax gë bënax dek gër bandëwëra band Bëyisërayel. Er hi bani bër gë nangënëme bën:

⁵ gër andëwëra and Yuda, bela owëli epëxw gë bëxi

gër andëwëra and Ruben, owëli epëxw gë bëxi
gër andëwëra and Gad, owëli epëxw gë bëxi;

⁶ gër andëwëra and Aser, owëli epëxw gë bëxi;
gër andëwëra and Nefëtali, owëli epëxw gë bëxi;
gër andëwëra and Manase, owëli epëxw gë bëxi.

7 Gër andëwëra and Simewon, owëli epëxw gë
 bëxi;
 gër andëwëra and Lewi, owëli epëxw gë bëxi;
 gër andëwëra and Isakar, owëli epëxw gë bëxi;
 8 gër andëwëra and Sabulon, owëli epëxw gë
 bëxi;
 gër andëwëra and Yosef, owëli epëxw gë bëxi bër
 gë nanganëme;
 gër andëwëra and Benjêsame, owëli epëxw gë
 bëxi.

End amëxwër and gër lëngw ir Kaxanu en

9 Ga xucak eno, wat këme amëxwër atëm
 and bëla bër ekun ed ex yo, enëng end ex yo,
 bulunda ir ex yo do bëla bër eyeyan ed ex yo, ala
 axo kor dona ebi pën. Axwëšara xwëšara bani
 gër lëngw ir ar yëpak gër añëpara and owun an,
 do gë lëngw ir anobo. Bocud bopëšax šudara
 bani do lëkayara bani benid.

10 Mondako bani xeyënd: «Apexa aŋ gër
 Kaxanu ex, mëŋ ar xwën këbo an, mëŋ ar yëpak
 gër añëpara and owun an, do gër anobo!»

11 Ata omeleka ok dek xwëšara këni jey
 añëpara and owun aŋ, gë bëxarëk bën do gë
 bebëbëngw bebëbëx bën. Ata foxira këni eyiŋ
 el nêš gër ebar gër lëngw ir Kaxanu.

12 Ga këno šale, këni rend: «Amen! Obetak
 ol, gë enjaran en, gë orenik ol, ecëkwan el, gë or
 gapak ol, gë panga in do gë ojawš ok, Kaxanu, mëŋ
 ar xwën këbo an, xwënëk din ir din! Amen!»

13 Na ex wëka ke axarëk abat: «Nobën ex wa
 bëla bër gë bocud bopëšax bëjo? Feye wa xaniw
 këni?»

14 Yaka këmo: «Oko Šaca, wěj anang nang këy!» Ata re ko:

«Bën ex bër xaniwëk gër toro itëm bën.
Aneþ neþ këni þocud þondeþën þoŋ,
Awunëta wunëta këni gë ošat or anobo oŋ.

15 Mëŋ xwëšaxën këni
gër lëngw ir añëpara and owun and Kaxanu
do këno šalerand ciš wec gër Aciwë andexëm.
Ar yëpak gër añëpara and owun an këbi xaxa
gër ed lëg ko;

16 din abi kor na enjo, din abi tel na men;
oyat abi cor na, ayëka abi di na.

17 Gayikwa anobo ex mërëxand ir gër ed ex
añëpara and owun aŋ, këbi yana ebi
kaðacënd.

Awëla këbi yana ebi mëland gër bañësa, gër ed
ex men ond aniyan.

Do Kaxanu ebi pëxwëcënënd ðek ongwën oŋ gër
bangës þandëþën.»

8

End eðaramët ed anjongakinëm eŋ

1 Anobo aŋ, and laramët ko gër ed laram bani
anjongakinëm aŋ, yerirak gër orën ipëxëd.

2 Wat këmëni omeleka ocongoki od kë
xwëšand gër lëngw ir Kaxanu ok. Yël këneþi
okerelon ocongoki.

3 Ata yow ko meleka išëxe, xwëša ko ler
gër angëþ do lëkaya ko ipeya ind kaŋe ind
bani šoraxënënd ašururu ir xwëšëna bani gë
angiri in. Yël këno ašururu ir mbaŋ exo cor ex
bararaxën gë cale ind ðek bëwënek iŋ gër angëþ

and kaŋe and ex gër lëngw ir añëpara and owun.
⁴ Ga kē šëni ašururu in gër ataxan and meleka, kē yend gē cale ind bēwënëk in yaŋ gër Kaxanu.

⁵ Meleka in wëd ko ipeya ind kēni šoraxënënd ašururu in, xëñëna ko pëxw oÿen or gē xodux or wëdëgu ko gër angëb oŋ, do lap ko gër ebar. Atañ wëlik oxëbër or ekëman, gē odiw, wingarak bandanjëm do ebar el rëgëk.

End okereloŋ ocongoki eŋ

⁶ Ata omeleka ocongoki od lëkaya bax okereloŋ ocongoki ok kēni xëñënanand eni parix.

⁷ Meleka iÿanar in farix ko kereloŋ in. Wëcëguk gër ebar bebër ang oxaÿ do gē xodux ga bararëk gē ošat oŋ. Ata ang šetërek ebar el obebët otas ak, bebët ibat ÿegëk dëk gē batëx ak do gē ondës ocëkët ak. ⁸ Meleka ixinëm in farix ko kereloŋ in. Wëcëguk er ang atënd and gē angodux gër angwëngw. Ata angwëngw aŋ ang šetërek obebët otas ak, men oŋ nëngwëtak ošat bebët ibat.

⁹ Ata šësëra kēni bebëngw bër bax liyand gër bebët ir nëngwëta bax men oŋ ošat. Bëte nëxenarak okuluŋ od hi bax na ok.

¹⁰ Meleka isasën in farix ko kereloŋ in. Wëcëguk amal elod gër orën do kē ÿegënd ang enjeb fo. Ang šetër bax oyeb ok do gē bañësa band men baŋ obebët otas ak, amal aŋo wëcëk gër bebët ibat.

¹¹ Amal aŋo kēni wăcënd «Pošon iwax». Ata men oŋ wak bebët ibat, do bela bëranjëm šës kēni and šëb kēni aŋ.

¹² Meleka inaxën in farix ko kereloŋ in. Eñan eŋ, gë facawñ in do gë ował oŋ lobërak bebët ibat. Ata goyat in bašetak mar ekërikëran el do gëmëd in hik mondako fo.

¹³ Ga këme nëkon, wat këmo šambat ga songina ko yaŋ gër orën do ko xeÿënd: «Kata! Kata! Kata këbi fënga bër lëgëk gër ebar ro bën and këni farix kereloŋ omeleka otas od bayik aŋ!»

9

¹ Meleka icoxën in farix ko kereloŋ in. Wat këme emal ga wëcëguk gër ebar elod gër orën. Emal elo fëxwën këno acoketaya and ambëxw atiŵax aŋ.

² And fërët ko atënda and ambëxw atiŵax aŋ, kë šanënd okwëcën ond ang angodux fo. Eñan eŋ šamëdfanëk gë okwëcën ond xëñ bax gër ekoc oŋ.

³ Ata gër okwëcën oŋo këni šanënd owure, xul këni ebar el dek. Yël kënebi ojaŵ od ang ekwël ed kë yexërand gër ebar fo.

⁴ Fel kënebi enëbi ŋatënd bela bër gë nanganëme ir Kaxanu këm gër eyiÿ bën fo, bari këreni dinan na eñëŋenax ondës ond lëgërak gër ebar oŋ, gë bebëlëg bën, do gë opat od batëx ok.

⁵ Er fel banëbi enëbi narënënd anarën fo bela bën xali ex nëka opacaŵ oco, bari kërenëbi dfaŵënd na. Baŋaten bandebën baŋ ang band ekwël fo yambën bax.

⁶ Ata bakey baŋo, bela bën mocala këni ÿana eni caland ecës el, aÿandi këbi ÿana ebi ÿandind

eni cës, bari ani cës na. Ecës el mongër këfi
ÿana ebi gërënd.

⁷ Er hi bani owure olo ang opanac od fokëra
kënëfi ond gër emer fo. Gër ogaf odebën bax
watind bebër ang oxamote or owun or kaņe, do
odëxas odebën ok hi bax ang od bela fo.

⁸ Omban ondebën oņ așak șak bax ang ond
bësoxari fo, do oÿënga orebën oņ ang or ojëraņ
fo.

⁹ Gër oŵëkw orebën xapa bani bapëxw band
dun, do obafe odebën ok axëbër bax xëbërënd
ang ocaret od këni lasënd opanac odanjëm od kë
wëlënd gër emer fo.

¹⁰ Oceb odebën ok ang benjif bend oxwël fo
hi bax. Gër oceb oko hi bax ojaŵ od banëfi
yambëninaxënënd bela ok xali nëkak opacaŵ
oco.

¹¹ Emun endebën eņ ex meleka ir gër ambëxw
atiŵax in. Oŵac orexëm ol ex gë eyeyan ed
Bëșëwif el: «Abadoņ». Do gë eyeyan ed Bëgërek
el: «Apoliyoņ», mëne ngëņ «Anemin an».

¹² Kata iňanar in xucak, bayik ex yow betëm
beki becëxe.

¹³ Meleka icongibatën in farix ko kereloņ in.
Wël këme oniŵ gër oparix onax od ebax gër
oŵaŵ onax or angëb and kaņe and ex gër lëngw
ir Kaxanu aņ.

¹⁴ Oniŵ olo baņo felënd meleka ir gë kereloņ
in mondako: «Pëtëlëbi omeleka onax od xap
kënëfi gër yeș isëm ir këni ŵacënd Efërat ok.»

¹⁵ Ata fët këfi omeleka onax od bax șëninđ
apëxëd aņo, akey aņo, do iniy iņo ok, enëfi
dãŵaxën bela bën amëxwër amat, gër batas.

16 Wël këme yëgwe hi këni ocoroda od gë opanac ok: owaxe okeme oki.

17 Mondako wat bamëni gër lakeli opanac ok do gë bër yëpaxën babi bën. Er xapa bani bapëxw band dun band war bax ang xodux fo, band hi bax ang ekaÿ ed yasenjët fo do band ang mungu fo. Ogaf od opanac oko er hi bax ang od ojëranj fo. Gër osëÿ orebën bax şanënd xodux, gë okwëcën, do gë mungu.

18 Ata betëm betas bejo lawë këbi bela bën amëxwër amat gër batas gë xodux ol, gë okwëcën, do gë mungu, ond bax şanënd gër osëÿ or opanac oñ.

19 Gayikwa ojaÿ od opanac oko gër osëÿ do gër oceb odebën ebax. Oceb oko ang bandën fo bax do hi bax gë ogaf do gë oko banëfi yambëninënd bela bën.

20 Bela bëşëxe, bër bayik abi dawë bana betëm bejo bën, ani teb bana ecale ed bebër bani rind bën el, ani nëngwët bana ola orebën ol, xali eni teb ekëla ed bëyël el. Ani teb bana olaş or kañe oñ, or kodï oñ, or yawale oñ, or oxaÿ oñ do gë or ex otëx oñ. Xarak olaş oño ax watërand na, ax wëlërand na, ax yexërand na.

21 Bela bëjo ani nëngwët bana ola orebën ol xali eni teb bamena baño: edawër el, gë obanji ol, gë asëk alakirand fo in do gë orek ol.

10

End meleka in do gë ikayëta eñ

¹ Ata wat këmo meleka ifangak ga ko fedaw elod gër orën ga labaya ko gë anjar, do şandiÿ in

hik jey gër gaf irexëm. Dëxas in kë ÿegënd ang eñan fo, do owonëng orexëm oñ hik ang okëcar od gë xodux fo.

² Lëkaya ko gër ataxan ikayëta ind lëkwët baxo. Xwëša ko, sapar ir liw̃ in gër angwëngw do ir šame in gër ebar.

³ Ata xeÿ ko ang eñëra ed yërañ fo. And xeÿ ko añ, yaka këño oxëbër ocongoxi or ekëman oñ.

⁴ And yeyanëk oxëbër ocongoxi or ekëman añ, këme xëñënannd me ñëgw er wël këme in. Barikan wël këme oniw̃ gër orën ga kë re: «Cësinälil end rek oxëbër ocongoxi or ekëman eñ, kërey ñëgw na.»

⁵ Ata meleka ir wat bamo ga xwëša ko gër angwëngw do gër ebar in, yën ko ataxan and liw̃ añ end orën eñ.

⁶ Yašar ko gër oŵac or ar kë liyand din ir din an, ar rik orën an do gë ðek bebër gër orën bën; ar rik ebar an do gë ðek bebër gër ebar bën; ar rik angwëngw an do gë ðek bebër gër angwëngw bën. Meleka in re ko: «Endey eño gogo kë ñatëgu, ax nëka na!

⁷ Barikan gë šakey šand ko farix kerelon meleka icongixinëm šañ kë šonëtaya end Kaxanu eñ ang nangën babi elod anëka fo bëriyenin bërexëm bën, bëlaŵënel bën.»

⁸ Ata oniw̃ or yeyaneliw baxe elod gër orën ol, fel ke gašëxe: «Yel ey kana ikayëta in gër ataxan and meleka ir xwëšak gër angwëngw do gër ebar in.»

⁹ Ye këme gër meleka, do fel këmo exe yël ikayëta in. Yaka ke: «Medël ey gël, ang dingën

fo kē yēw̃ gēr etēỹ edey. Barikan awa kē wa gēr acēl andey.»

¹⁰ Wēd kēme ikayēta in̄ gēr ataxan and meleka do hēl kēme: yēw̃k ang dingēn fo gēr etēỹ edam. Barikan and hēl kēme aṅ, acēl andam aṅ wak.

¹¹ Ata fel kēne: «Afo ey yeyanēnd ang alaw̃nel fo bēnd kēbi hi bela beṅ obulunda odanjēm, gē benēng bēdanjēm, gē oyeyan oranjēm, do gē bemun bēdanjēm.»

11

End otede oki eṅ

¹ Ata fēxwēn kēne ošēt do re kēni: «Kanil ey tēyi Aciw̃ and Kaxanu aṅ ang yāngēk ak, gē angēb aṅ do eyēbi pēn bēr kē šalend lēf na bēn.

² Barikan yangana ir fac ir Aciw̃ and Kaxanu in, tebēl mondako fo. Kērey tēyi na gayik benēng becēxe beṅ sebēn kēnēbi. Bēn kē wēñēra angol amēnēk aṅ opacaw̃ ofēxw onax gē oki.

³ Ayēl kēmēni otede oki odam ok eni yeyanēnd ang bēlaw̃nel fo beỹ bēn. Gē ojabote kēni fēlaya do enēbi nangēn bela bēn end Kaxanu eṅ nē bakey wēli gē okeme oki gē ofēxw ocongebat.»

⁴ Otede oki oko ex bañarēka baki baṅ, do gē odambo oki od hik gēr lēngw ir Axwēn ebar ok.

⁵ Angēmēne ala eṅo yāndi ebi yambēnin, xodux kē šan gēr osēỹ orebēn, do enēbi gēl bērangoyēra gē bēn bēn. Eyo mondako ko šēs ar kēṅo yāndi ebi denan eñēṅenax an.

⁶ Aşot şot këni panga ind eni përa orën ol kërex tēb na dēk bakey band këñēbi nangēn end Kaxanu baŋ. Axor exēni eni nēmbēt men oŋ oşat do eni di beñigēnaxik bēnd ex yo gēr ebar nand këbi ŷandi yo.

⁷ And këni faŷ osede orebēn aŋ, emacar end kë şanēgu gēr ambēxw atiŵax eŋ ebi mereli, ebi kor do ebi dāŵ.

⁸ Ata exo ŷaŋēta beman bēnd otede oki beŋ gēr fēña isēm ir gēr angol atēm. Angol aŋo ex, gēr owat or Kaxanu, Sodom do gē Misēra, na gēr ed fika bano Axwēn arebēn na.

⁹ Bela bër bulunda ir ex yo, gē bër enēng end ex yo, gē bela bër eyeyan ed ex yo, gē bër ebar ed ex yo awat këni wat beman bēndebēn beŋ bakey batas gē tēkēr do ala ano teb na ebi mēxwēta nē ŷeg.

¹⁰ Bela bër lēgēk gēr ebar bēn ga nēngandēra këbi end ecēs edebēn eŋ këni rixēnēd ofēna xali eni yēlērēra beŷ gayik bēlaŵēnel bēxi bējo aşēndēn şēndēn banēbi.

¹¹ Ga xucak bakey batas gē tēkēr, angoc and kë yēlēnd and aniyān aŋ, xaniwēk gēr Kaxanu, lil këbi do xwēşan këbi ceg. Ata yēdara këni mbaŋ bër babi wat bēn.

¹² Wēl këni elod gēr orën, oniŵ osēm ga këbi fel: «Yowēn yaŋ ro!» Ye këni gē aŋar aŋ yaŋ gēr orën do bērangoyēra andebēn bēn wat këñēbi.

¹³ Ata amēd aŋo dēŋ hik angēmēgēm atēm gēr ebar do ang ex owebēt epēxw od angol ok, bebēt ibat wēcēk. Nemira këni bela owēli ocongoki nē end angēmēgēm aŋo. Bër bayik bēbēngw bēn

yëdara këni, do sëkw këni enjaran end Kaxanu eņ, mëņ ar gër orën an.

¹⁴ Kata ikinëm in anëka xucak, gogo kë ñatëgu itasën in.

End kereloņ icongixinëm eņ

¹⁵ Ata meleka icongixinëm in farix ko kereloņ in. Wëlik gër orën odiw otëm ga kë re:

«Owun or ngwën ol,
Axwën arebi an xwënëk
do gë Kërisët irexëm,
din ir din ko wun!»

¹⁶ Bëxarëk alapem gë bënax bër yëpa bax gër bañëpara band owun, gër lëngw ir Kaxanu bën, foxi këni eyiỹ el nêš gër ebar,

¹⁷ do këni rend:

«Ayeri këy Axwën Kaxanu,
wëj ar xorëk beỹ dek an,
wëj ar hik do hi bay,
gë panga itëm indey in wun këy.

¹⁸ Axoỹen xoỹen këni benëng beņ,
barikan gërëgako yowëk oxoỹ orey ol,
amëd and këyëbi xiti bëšëk aņ,
eyëbi pupa bëriyenin bërey bën,
bëlawënel bën, gë bëwënëk bën
do gë bër fëbëk ować orey bën, hik bër gapak
bën,

hik bërëtoc bën do eyëbi nemin bër kë nem-
inënd ebar bën!»

¹⁹ Aciw and Kaxanu and hik yaņ gër orën aņ fërëtayak, watik lëf kangara ir eter in. Ata wingararak, wëlik odiw, gë oxëbër or ekëman, ebar el rëgëk do kë wëcënd bebër ang oxaỹ.

12

End asoxari do gë fato en

¹ Ata nanganëme isëm şanayak gër orën: asoxari ar şudak eñan en, facaw in dila, gër osapar orexëm do şexwa ko ekamote ed owun ed gë ował epëxw gë oxi.

² Gë acël ebaxo do and hatëk orëw an, ko xeýënd ayambën in do gë toro ind orëw in.

³ Şanayak bête gër orën nanganëme işexe: fato isëm, ir war bax ang xodux fo, ir gë ogaf ocongoki do gë ofarix epëxw. Er hi bax në gaf kala ekamote ed owun.

⁴ Gër obebët otas od ował or gër orën, fat ko ibat gë şeb irexëm in do lapëgu ko gër ebar. Ata fato in buna ko, fabër keni gë asoxari ar orëw an, eno gëlxën itox in sam eno dëw.

⁵ Rëw këno itox itoşan, ind këbi xadac benëng beş dek gë xwëlekwële ir dun*. Na Kaxanu wëla këno itox ino ler gër ndexëm, ler gër añëpara and owun andexëm.

⁶ Asoxari an cëş, hër ko dúp gër ladawe, gër ed xëñënan başo Kaxanu exo gix, gër ed këno lëbax bakey wëli gë okeme oki gë ofëxw ocongebat.

⁷ Ata fëtëk emer gër orën. Mişel gë omeleka odexëm ok keni wërënd gë fato in. Bête fato in do gë omeleka odexëm ok wëreli kënebi.

⁸ Ga xor kënebi, fato in gë odexëm şan keni në er keni hi yaş gër orën.

⁹ Ata lapëgu këno gëd, fato isëm in, andën akarëk an, and këno wacënd şabucara, do

* **12:5 12.5** Xwëlekwële ir dun ino wacayak owun or sibëk mban

Sindan aŋ, and këbi yifand bela bër gër ebar aŋ.
Lapëgu këno gëd gër ebar ro, mën gë omeleka
odexëm ok.

¹⁰ Ata wël këme oniŵ osëm yaŋ gër orën, ga
kë re:

«Gërëgako anëka ñatëguk apexa aŋ,
gë panga in, gë owun or Kaxanu ol,
mën ar xwën këbo an
do gë owun or Kërisët irexëm ol.
Gayikwa anëka lap këŋo gëd,
alëxw ar bëmaÿe bëndëfi an,
ar babi lëxwënd ciŝ wec gër Kaxanu,
mën ar xwën këbo an.

¹¹ Barikan bën, axor xor këno gë oŝat or anofo
oŋ

do gë eyeyan ed osede orebën el;
ani ŋan ex na nëmëc aniyan andebën aŋ
ado ga banëbi wesand
mëne alaŵ kënebi laŵ.

¹² Wën bër gër orën bën,
wën bër lëgëk fën bën,
nëngandëraleŋun.

Barikan etëm hi këŋun
wën bër gër ebar bën do wën bër gër angwëngw
bën,
gayikwa ŝabucara in anëka ŝëlali ko gë oxoÿ
osëm
ga nang ko mëne bakey band bayi këŋo ban
bapënëfëne fo ex.»

¹³ And wataya ko fato in mëne anëka lapëgu
këno gëd gër ebar aŋ, sëf këŋo asoxari ar rëw
këŋo itox itoŝan an.

¹⁴ Ata asoxari an yël këno obafe oki od ŝambat
isëm ok exo cëgaxën gër ladawe, gër wur

irexëm, gër ed këno lëbax bëniy bëtas gë təkër, gër ed bayik aņo ņatën na andën aņ.

¹⁵ Andën aņ wis ko men ang oÿëm fo gand epoy ed asoxari eņo mëlaxën.

¹⁶ Barikan ebar el rëca këņo asoxari an do hëlëk oÿëm or wis baxo fato ol.

¹⁷ Ga logën këņo end asoxari ajo eņ, fato in ye ko ebi merelix bërandëwëra and asoxari bën, bër fëbëk bapela band Kaxanu do këni reyarand osede or Yesu bën.

¹⁸ Ata buna ko gër edini ed bëņa ir angwëngw.

13

End oŵacar oxi eņ

¹ Ata wat këmo emacar end gë ofarix epëxw do gë ogaf ocongoki, ga šëpëtaw ko gër angwëngw. Er hi bax në farix kala ekamote ed owun, do ÿëgwëra këni gër ogaf odexëm, omac od këņo širënd Kaxanu.

² Emacar end wat bamo eņ, ang ecaŵ fo hi baxo, osapar orexëm oņ hi bax ang or andawë fo do etëÿ el ang ed yëraņ fo. Fato in yël këņo panga indexëm in, owun orexëm ol do gë or gapak osëm.

³ Gaf ibat irexëm in mbaņ sembaÿ bax, ecës el fo bayi bax. Barikan afak fak baxo.

Ata ga babi šaranënd end emacar eņo eņ, dëk ebar el këņo sëfënd.

⁴ Afoxi bani foxind gër lëngw ir fato, eno calexën gayik mëņ yël baņo owun ol emacar eņ. Afoxi bani foxind bëte gër lëngw ir emacar eno calexën do eni dend: «Noÿo wa ex ang emacar eņo? Do noÿo kë xor eņo mereli?»

⁵ Ata emacar eņo ŝot ko etëŷ ed bax yeyanënd
gë ndafënan do gë ed këņo ŝirënd Kaxanu.
Asebën sebën bano owun ol xali opacaŵ ofëxw
onax gë oki.

⁶ Emacar eņ ga ħebëta ko, këņo ŝirënd Kaxanu
maġ gë eyang edexëm ak, këbi renarand mëņ do
gë bër lëgëk gër orën bën.

⁷ Aseb seb bano bëte eġi mereli bër ex bulunda
ir Kaxanu bën xali xor këbi. Ayël yël bano panga
ind eġi bëña ebar el dek: ekun ed ex yo, gë
bulunda ir ex yo, gë bela bër eyeyan ed ex yo
do gë enëņ end ex yo.

⁸ Ata dek bër lëgëk gër ebar bën, bër bayik
omac odebën ani ñëgw ex na gër akayëta and
aniyan and anobo and ŝadaxa bano elod ga
ŷanak ngwën aņ, afoxi këni ŷana eni poxind gër
lëņgw ir emacar eno calexën.

⁹ Awa ar gë anëf an, baxëtëlexo de!

¹⁰ Ar ebax eno mëla oxadëp an,
aŵëla këno wëla gër oxadëp.
Ar ebax eno daw gë duxuma an,
alaw këno law gë duxuma.
Mëņ ex, bëwënek bën,
aŷap ŷapëk eni buņand, këreni teb na ekwëta
el.

¹¹ Ata wat këmo emacar ecëxe ga ŝanëgu ko
gër ebar. Bëparix bëki ŝot baxo ang anobo fo,
do baxo yeyanënd ang fato fo.

¹² Panga ind emacar eņanar in ŝot baxo do
baxo rind becarax gër lëņgw ir emacar eņo.
Anëŷali babi nëŷalind dek bela bër lëgëk gër
ebar bën eno calend emacar eņanar eņ, end
sembaŷ bax dam gër ecës, bari fak ko eņ.

13 Emacar ekinëm eņo becarax betëm baxo rind xali fedaliw ko akey amat, ogës od bela, xodux ol elod gër orën xali gër ebar.

14 Mondako babi nambelind bër lëgëk gër ebar bën gë becarax bend seb bano exo dind gër lëngw ir emacar beņ. Afel babi felënd eni di edaš ed ang eñañ end emacar end sawñ bano gë duxuma do fakëta ko gër aniyar eņ.

15 Ašot šot baxo panga ind exo nëngwët edaš elo xali ex yeyandërand, do ebi d'awënd dek bër ax poxind na eni cale eñañ end emacar eñanar bën.

16 Anëyali babi nëy'alind bela bën dek, hi këni bër gapak, bërëtoc, bër gë napul, bëxayëanaxik, okadëp, bër ax gi ex na okadëp, eni ma enëbi din ala kala nanganëme in, bërëmar gër ataxan and liw, bëjo gër eyiỹ.

17 Yama ala abax xor na wa exo yëcëra beỹ ba exo pandëra cotërexe nanganëme in, oñac or emacar ol ba nimëro ir oñac orexëm in.

18 Awa ro, orenik wëkak. Ar gë onden an, calalexo exo nang er wacayak nimëro ir emacar in. Gayikwa nimëro ir ala ex do er ex: «Okeme ocongibat gë ofëxw ocongebat gë bënjongimat.»

14

End oyëkan or bëwënëk eņ

1 Ata wat këmo anofo aņ mo kwëša yaņ gër etënd ed Siyoņ ga xeta këno bela owëli keme gë ofëxw onax gë bënax bër šotëk nanganëme ir oñac orexëm in do gë or Sëm in, gër oyiỹ orebën.

² Wël kême gër orèn oniŵ or ang oÿëm fo, or ang oxëbër or ekëman etëm fo. Do angonj and bame wëlënd aŋ hi bax ang and bësëmb bër bemangi bendanjëm fo.

³ Bela bëjo aÿëw bani ÿëwënd oyëkan oxaşax gër lëngw ir aňëpara and owun do gër lëngw ir bebëbëngw bebënax, do gër lëngw ir bëxarëk. Bela owëli keme gë ofëxw onax gë bënax bër racët këbi Kaxanu gër ebar ro bën fo bax ÿëwënd oyëkan olo. Gabatak ax kor bana exo tÿya oyëkan olo.

⁴ Bën anëbi nang ex na bësoxari, ani buyarënaya ex na gë bën. Bën këŋo sëfarand anofo aŋ gër ed ko ye yo. Kaxanu racët këbi mërëxand ir bela eni gixën bëÿanar bër xwën kënëbi mëŋ do gë anofo aŋ.

⁵ Do gër osëÿ orebën, enëgwëş ax gi ex na. Etëmbak ax gi ex na gër ola orebën.

End omeleka otas eŋ

⁶ Ata wat këmo meleka işëxe ga ko şëgëra yan gër orèn. Atëfëtan and din baxo xëňënanđ ebi nangën bela bër lëgëk gër ebar bën, gë enëng end ex yo, gë ekun ed ex yo, gë bela bër eyeyan ed ex yo do gë bulunda ir ex yo.

⁷ Ga ko xeÿ ko rend: «Yëdayindëno Kaxanu do cëkwindëno gayikwa anëka hătëguk apëxëd and ko xiti ngwën aŋ. Poxiyindën eno calexën ar rik orèn, gë ebar, gë angwëngw, do gë baňësa band men an!»

⁸ Meleka ixinëm sëfëgu këŋo iÿanar in do ko rend: «Anëka nëxenak, anëka nëxenak, angol

atëm and Babilon aŋ! Mëŋ yëla këbi ngoy ind eñac endexëm in ðek ßenëŋ ßend ßela ßeŋ*.»

⁹ Meleka isasën sëfëgu këbi oki oñanar ok. Ga ko xeŷ ko rend: «Angëmëne ßela eno calend emacar eŋ, gë edaŝ ed w̄atinali këno el, do angëmëne eni cot nanganëme irexëm in gër oyiŷ ba gër ßataxan,

¹⁰ aŝeß këni ŝeß ßën ßëte oxoŷ or Kaxanu ol ang ngoy fo. Ang ngoy inëmbarëx fo kënëbi xatën andëmba aŋ cëm. Asoro këni ŷana eni torond polo gër xodux, gër mungu gër lëngw ir omeleka omënëk, do gër lëngw ir anobo!

¹¹ Din ir din kë ŷana ex cënind okwëcën ond xodux or këbi ŝorënd ßër këŋo ŝalend emacar do gë edaŝ ed w̄atinali këno ßën. Hik gëmëd, hik goyat, ani ñana na eni teyëtand toro in. Mondako fo këŋo hi ala ar ŝotëk yo nanganëme ir oŵac orexëm in.»

¹² Mondako ex, ebuŋa ed ßëwënëk el, ed ßër kë sëfënd ßapela ßand Kaxanu do xwëta këno Yesu ßën.

¹³ Ata wël këme oniŵ yaŋ gër orën ga kë re: «Ñëgwël: “Nëŋandëralebi ßëŝëk ßër xwëta këŋo Axwën do ŝës këni elod gërëgako ßën!” Angoc Amënëk aŋ ga re ko: “Iyo, teyëtalexëni ßandiyen ßandëßën ßaŋ gayikwa në etëfa ebi ßandixa ßandëßën ßaŋ!”»

End ekanara ed ßeßër gër ebar eŋ

¹⁴ Ata wat këme aŋar apeŝax, do gër aŋar aŋo ŷëpa ko ar ang aŝëñiŵ ar ala fo. Ekamote

* **14:8 14.8** Gër oñëgw odëmar er ŷëgw këni mëne ngoy ind oxeŷ or eñac endexëm in.

ed owun ed kaŋe šêxwa baxo, do lëkaya baxo xorom iñakax.

¹⁵ Ga šanëgu ko meleka ișêxe gër Aciw̃ and Kaxanu, ko xeÿend gand ar ÿëpak gër aŋar: «Medël xorom in, ey ɳașaxën beber gër ebar bën gayik anëka sëgëk, anëka ñatëk ekana el.»

¹⁶ Ata ar ÿëpak gër aŋar an lap ko xorom in gër ebar. Hașëk dek beber gër ebar bën.

¹⁷ Meleka ișêxe šanëgu ko gër Aciw̃ and Kaxanu, and hik yaŋ gër orën aŋ. Mëŋ bëte lëkaya ko xorom iñakax.

¹⁸ Ga šanëgu ko gër angëb meleka ișêxe, ir xorëk xodux, ko xeÿend gand ar lëkayak xorom iñakax an: «Medël xorom in ey ɳașaxën bacaÿ band odëwërewen od reseŋ band ex gër ebar baŋ, gayik anëka sëgëk.»

¹⁹ Meleka in lap ko xorom irexëm in gër ebar ata ñașëk bacaÿ band atëx and reseŋ and gër ebar baŋ do xobëx ko polo gër akaraxën and kë wâtinalind oxoÿ or Kaxanu aŋ.

²⁰ Ga wëla këni reseŋ in gand angol, xobëx këni gër akaraxën and hik fac. Ata šanëk oșat and bani wëñënd gër akaraxën aŋ do oșat oŋo fesëk në baŋakan okeme otas. Kido eni përado opanac, ogaf ok fo watidox.

15

End beñigënaxik bepelatar eŋ

¹ Ata wat këme gër orën nanganëme ișêxe, isëm, do ișaraxik: omeleka ocongoki ga lëkaya këni beñigënaxik benjongëbeki bepelatar beŋ.

Gayikwa Kaxanu, paß gë beñigënaxik beŋo ko ñata oxoŷ orexëm ol.

² Wat këme anjer and kal-kal ang anangoye fo ga bararëk gë xodux ol. Wat këmëni bëte bër xor këŋo emacar bën, gë eñaŵ endexëm ak, gë edaš edexëm el, do gë nimëro ir oŵac orexëm bën. Gër anjer and ang anangoye xwëšara bani do lëkaya këni bemangi bend yël këbi Kaxanu beŋ.

³ Ata këni yëwënd oyëkan or Moyis, ariyenin ar Kaxanu ol, do gë oyëkan or anofo ol:
«Bandixa bandey baŋ batëm ex, bacaraxik ex, Axwën Kaxanu, wëj ar xorëk beŷ dek an, bebër këy rind bën ðal ex do šenene ex, wëj ex emun end benëng eŋ.

⁴ Axwën, noŷo bayik axi pëb na?
Noŷo bayik ax cëkw na oŵac orey ol?
Wëj gabat ex aŵënëk an.
Enimin, benëng beŋ dek ayow këni yow eni poxira gër lëngw irey,
gayik or šenene orey ol šanayak.»

⁵ Ga xucak eŋo, ga këme nëkon gër orën aciŵ and Kaxanu aŋ ga fërëtayak, wat këme aner and Osede aŋ.

⁶ Omeleka ocongoki od lëkaya bax beñigënaxik benjongëbeki ok šanëgu këni gër Aciŵ and Kaxanu. Šuðara këni banjëm band xaf-xaf bamënëk, band jing-jing, do xapa këni bapëxw band kaŋe gër oŵëkw.

⁷ Abat gër bebëbëngw bebënax, fëxwën këbi omeleka ocongoki ok bandëmba banjongëbaki

band kaŋe band ebax cēm gē oxoŷ or Kaxanu, mēŋ ar hik din ir din an.

⁸ Aciw̃ amēnēk aŋ lēbēk gē okwēcēn oŋ nē end enjaran end Kaxanu eŋ do gē panga indexēm iŋ. Ata ala abax xor na exo dīl gēr Aciw̃ and Kaxanu xali xwētēk beŋigēnaxik benjongēbeki bend omeleka ocongoki beŋ.

16

End bandēmba banjongēbaki band oxoŷ eŋ

¹ Ata wēl kēme oniw̃ gēr Aciw̃ and Kaxanu. Ga kē xeŷ oniw̃ olo, kēbi felēnd omeleka ocongoki ok: «Awa yeyin en dexēx bandēmba banjongēbaki band oxoŷ or Kaxanu baŋ gēr ebar!»

² Meleka iŷanar in lex ko andēmba aŋ gēr ebar. Ata bēla bēr šot bax nanganēme ir emacar in do bani foxind eni cale gēr lēngw ir edaš ed eñaw̃ edexēm bēn, lēk kēbi ošēxwēra oyambēnaxik: beman beŋ hik yer okejēn fo.

³ Meleka ixinēm in lex ko andēmba andexēm aŋ gēr angwēngw. Men oŋ nēngwētak ošat ang or ala ar ħaš kēno fo, do dek oŵacar obēngw or hik polo ol šēsēra kēni.

⁴ Meleka isasēn in lex ko andēmba andexēm aŋ gēr oyeḅ do gēr bañesa band men, nēngwētak dek ošat.

⁵ Wēl kēmo meleka ir xorēk men in ga ko re: «Wēj ar šenene hi kēy, wēj ex ar hik, do hi bax an,

aŵēnēk hi kēy gayikako mondako xiti kēyēbi.

⁶ Gayikako ošat or bēwēnēk do gē or bēlaŵēnel oŋ lexēra kēni,

duy dëj yël këyëbi oşat eni ceb.»

⁷ Wël këme oniŵ gër angëb ga kë re:

«Eyo Axwën Kaxanu, wëj ar xorëk beÿ dek an, kiti indey inj däl ex do şenene ex.»

⁸ Meleka inaxën in lex ko andëmba andexëm aŋ gër eñan. Eñan eŋ şotëk ojaŵ od ebi corënd bela bën gë xodux orexëm ol.

⁹ Ata ayëka isëm şor këbi bela bën. Barikan bën këni şirënd oŵac or Kaxanu ol, mëj ar babi lapanënd beñigëanaxik beŋo gë panga indexëm an. Ani nëngwët bana ola orebën ol eno duwaxën.

¹⁰ Meleka icoxën in lex ko andëmba andexëm aŋ gër añëpara and owun and emacar. Ata şamëdanëk gër ed wun ko, do bela bën këni wëcarërand ayambën in.

¹¹ Aşir bano şirënd Kaxanu, mëj ar hik gër orën an, ga bot këbi ayambën ir okejën in. Bari ani nëngwët bana ola orebën ol xali eni teb bandixa batëmbak bandebën baŋ.

¹² Meleka icongibatën in lex ko andëmba andexëm aŋ gër yeb isëm ir këni ŵacënd Efërat in. Men oŋ wëxëk eni kegëtaxën bemun bend kë xaniw apën-eñan beŋ.

¹³ Ata wat këmëni bangoc bañëñenax batas, band aŋ ofëkel fo. Angoc añanar aŋ şanëgu ko gër etëÿ ed fato, akinëm aŋ şanëgu ko gër etëÿ ed emacar, do atasën aŋ gër etëÿ ed alawënel anëgwëş.

¹⁴ Bangoc baŋo band şabucara ex, bën kë rind becarax do këni yend gër bemun bend gër ebar dek enëbi bar eno merelexën Kaxanu yatir akey atëm andexëm, mëj ar xorëk beÿ dek an.

¹⁵ Ata re ko Axwën an: «(Awa ang arek fo këme yeli.) Nëngandëralenjo ar këmo sêk dašêrêxe an. Amo pënga ex na tēb gē eman enj do axo ye na gē ašêfën, cudarêxe banjëm bandexëm ban.»

¹⁶ Ata bangoc banjo bar kënebi bemun beŋ gēr ed këni w̄acënd gē eyeyan ed Bêšewif el: «Arëmagedon».

¹⁷ Meleka icongixinëm in lex ko andëmba andexëm aŋ gēr ekoc. Wëliwëk oniw̄ osëm lëf gēr Aciw̄ and Kaxanu, gēr añëpara and owun ga kë xeŷ: «Anëka xwëtëk!»

¹⁸ Ata wingararak, wëlik odiw̄, gē oxëbër or ekëman, do ebar el rëgëk mbanj. Elod ga hi këni bela bën, ala ax wat ex na angëmëgëm andako rako aŋ.

¹⁹ Angol atëm aŋ šapërëk obebët otas. Bangol band benëng bend bela banj yëcarëk. Kaxanu abi xwëya bana bela bër gēr angol atëm and Babilon bën. Ata šebën këbi ang ngoy fo oxoŷ osëm orexëm or hi bax gēr andëmba ol.

²⁰ Dek ošir oŋ šapërëk do osënd oŋ yëcarëk.

²¹ Ata bebër ang bongaȳ bond sibëk gwër në okilo ofëxw onax wëcandëra këbi bela bën elod gēr orën. Barikan bën širëra këno Kaxanu në end eñigëanaxik etëm end hi babi enj.

17

End asoxari aŷacaxik enj

¹ Ata ang hi bani omeleka ocongoki od lëkayara bax bangalama banjongëbaki ok, ibat yow ko yeyaneli ke. Re ko: «Yow mi masin kiti

ind angol atēm, and ex ang asoxari aŷacaxik, ar ŷēpak yaŋ nē amen aŋ.

² Gē asoxari ajo wata kēni bemun bend gēr ebar beŋ asēk alakirand fo in, do bela bēr gēr ebar ro bēn anēka xor kēbi ang ngoy fo eñac endexēm eŋ.»

³ Ata meleka in wēla ke gē Angoc and Kaxanu aŋ gēr ladawe. Watēx kēmo asoxari ga ŷēpa ko yaŋ nē emacar embarax, end gē ogaf ocongoki do gē ofarix epēxw. Do eman eŋ hi ko dek omac od kēŋo ŷirēnd Kaxanu fo.

⁴ Asoxari ajo ŷuɗara ko banjēm bambarax band yek mbaŋ, banjēm band warēgeyan. ŷaŋēna ko gē orēxēr or kaŋe, do gē oyeri or oxaŷ oyekax. Lēkaya ko andēmba and kaŋe and ŷēm bax gē becusēsūs, do gē bemuyaraxik bend eñac endexēm beŋ.

⁵ Gēr eyiŷ edexēm ŷēgw kēni oŵac or ŷonaya bax: «Babilon, angol atēm aŋ, nēm ir beŷacaxik, do nēm bēr watak becusēsūs betēm bend gēr ebar ro.»

⁶ Wat kēmo asoxari ajo ga ŷaw kēŋo gē oŷat or beŷwēnēk oŋ do gē oŷat or otede od bax reyarand end Yesu oŋ.

Ga kēmo nēkon, ŷaran ke xali xurik.

⁷ Ata re ko meleka in: «Ineŷa ki ŷaranaxēnēnd? Wēno afel kēmi fel bend ŷonayak gēr asoxari ajo do gēr emacar end gē ogaf ocongoki, do gē oparix epēxw end ŷēpaxēn kēŋo beŋ.

⁸ Emacar end hi bax do wat bayo eŋ, axo bo ex na. Aŷanēgu ko ŷanēgu gēr ambēxw atiŷax do exo cēs. Bela bēr lēgēk gēr ebar bēn, bēr

bayik Kaxanu axo ñëgw ex na omac odebën gër akayëta and aniyän nand ri ko ngwën bën, ašaran këbi šaran and këno wat emacar aŋ gayik ahi hi baxo, šës ko, bête exo canayaw.»

⁹ Eŋo, onden ond arenik fo kë xor eŋo pëni. Ogaf ocongoki ok kë wätinalind bëtënd bënjongëbëki bënd yëpaxën ko asoxari bëŋ. Eŋo amatinali ex and bemun bënjongëbëki bête:

¹⁰ benjo lati këni, emat bayik ga wun ko, bari emun enjongekinëm eŋ axo yow ex na pere. And ko ŋatëgu aŋ, ax nëka na owun orexëm ol.

¹¹ Ata emun enjongetasën eŋ ex de emacar end hi bax do šës ko eŋ. Mëŋ fo ex bête emun enjongetasën, end kë šës din ir din eŋ.

¹² Ofarix epëxw or wat këy oŋ ex bamatinali band bemun epëxw bend anëbi maš ex na pere owun bëŋ. Barikan, awun këni wun apëxëd amat gë emacar eŋ.

¹³ Bën erebat këni šaland: eno diyenin emacar eŋ gë panga indebën iŋ, do gë ojawë odebën ok.

¹⁴ Awëreli këno wëreli anofo aŋ. Barikan anofo aŋ ebi kor gayik mëŋ ex Axwën ar bëxwën an, do Emun end bemun eŋ. Gë bër wac këbi, sana këbi do xwëta këno bën kënëbi xor.

¹⁵ Meleka in re ko bête: «Amen and wat këy gër ed yëpa ko asoxari aŋacaxik aŋ ex bamëxwër band bela bër lëgëk gër ebar baŋ, ang fitarëra këni dek benëŋ bëŋ, do gë oyeyan orebën ak.

¹⁶ Oparix epëxw or wat këy ok do gë emacar eŋ, ašus këno šus asoxari ajo. Axandëra këno xandëra napul ir šot ko in do axwëca këno xwëca exo bayi tëb gë eman eŋ. Ayamb këno yamb do eni bëlën er këbi bayita in.

¹⁷ Gayikwa Kaxanu yël këbi gër owëkw orebën eni di apënëta andexëm aņ, eni ņata apënëta amat, do eno yël owun orebën ol emacar eņ, xali ex ņata bend re ko Kaxanu beņ.

¹⁸ Asoxari ar wat këyo ajo hik angol atëm and wunëk gër bemun bend gër ebar ro aņ.»

18

End eyëcar ed angol and Babilon eņ

¹ Ga xucak, wat këmo meleka isëxe ga fedaw ko elod gër orën. Panga indexëm in itëm ebax do enjaran endexëm eņ ĥobak ebar el.

² Ata ko xeÿend: «Anëka yëcarëk, anëka yëcarëk Babilon in, angol atëm aņ! Anëka hik edëg ed bëyël, gë emaÿi ed angoc añëņënax and ex yo, do gë emaÿi ed acël añëņënax and ex yo, gë emaÿi ed emacar eñëņënax, do gë ecusësus end ex yo.

³ Mondako kë hi gayikako dek benëng bend bela beņ aseb šeb këni eñac etëm endexëm eņ ang ngoy fo. Bemun bend gër ebar ro beņ ari bani rind gë mëņ eñac eņ do befandëran bër gër ebar bën ašotëraxën šotëraxën këno gë panga ind napul irexëm in.»

⁴ Ata wël këme elod gër orën oniŵ ošëxe ga kë re: «Canin angol and Babilon aņ, wën bër ex bulunda iram bën, këdi kën wëndëra andamat gë Bëbabilon bën, do këdi këņun fënga wën bëte kiti indebën in.

⁵ Gayikwa beñëņënax bend Bëbabilon beņ asaÿar saÿarëk xali yaņ gër orën, do Kaxanu axo kwëya ex na betëmbak beņo.

⁶ Maşayinēbi ang banun rind ak. Cosinēbi gē toro in, ang banēbi šosēnd bēn bēte bela ak. Maşayinēbi bakēlēbēd baki bandixa bandebēn baŋ! Gē andēmba and banun rēmbēnēnd aŋ, dēmbēninēbi baki.

⁷ Ang babi nēngandērand nē end enjaran endeβēn ak, do nē end napul irebēn ak, torolexēni mondako fo. Ang wēli bax napul irebēn ak, wēli ex mondako fo toro indeβēn in do gē edenitaran edebēn el! Gayikako Bēbabilon bēn are bani rend: “Ang emun etoxari fo ŷēpa kēne, ane gi ex na asoxari aseβēta sebēta, biyi din kata aβo gi na.”

⁸ Mēŋ ex, akey amat fo kēbi fēnga βetēm βeŋo: ecēs el, gē odenitaran ok, gē enjo eŋ do enēbi dāp bēngēnj gēr angodux. Gayikwa Axwēn Kaxanu ex ar gē panga itēm an, ar kēbi xiti an.»

⁹ Dek βemun βend gēr ebar βend bax rind eñac gē angol and Babilon βeŋ, βemun βend babi nēnganēnd nāmbēran ind gē mēŋ βeŋ, ases kēni ŷana eni tesēnd, arenita kēni ŷana eni denitand nē end endexēm and kēni ŷana eni watēnd okwēcēn ond amēra andexēm aŋ.

¹⁰ Nacēt ako kēni ŷana eni kwēšarand nē end ga kēni yēdand amēra andexēm aŋ, do eni dend: «Oko etēm endako rako eŋo! Oko etēm endako rako eŋo, angol atēm aŋ!

Oko Babilon, wēj angol apangak aŋo!

Apēxēd amat fo rik űataxēnēguk kiti indey in!»

¹¹ Bēfandēran bēr gēr ebar bēn nē etes exēni, nē edenitara exēni nē endexēm gayik ala ax bo ex na ga kē yēcēnd opane odeβēn ok.

12 Opane oko er ebax: kaŋe, kofi, oxaŷ
 oxëbënaxik, oyeri, banjëm band xaf-xaf,
 banjëm bambarax, banjëm band gënd-gënd,
 banjëm band warëgeyan, bëmok bënd otëx
 od gë otëner onëngax do orëxër or fës këni
 gë oÿënga or beñamb, do gë otëx okëbënaxik.
 Opane oko er ebax bëte: bebër sap këni gë
 yawale, gë odun do bebër fës këni do gë oxaŷ
 oyekax or ÿër-ÿër.

13 Bëte opane oko er ebax: ogu onëngax ond
 këni wăcënd kanel, angiri, bebëlamb, bëshan
 bër këni wăcënd mir, ašururu ir xwëšëna bani
 gë angiri, ngoy, ogu, pix, bële, bengas, opeÿ,
 opanac, ocaret, okadëp do gë bandepëra.

14 «Bekëbënaxik bënd ÿandi baxi ey cot beŋ
 anëka šana ki do űawëta ki caw.
 Dek bebër yek do xëbënëk bën awew wew ki,
 do din ay wat na.»

15 Bëfandëran bër šotëraxën këŋo bën,
 nacët ako këni ÿana eni kwëšarand,
 ga yëda këni amëra and Babilon aŋ.
 Ases këni ÿana eni tesënd,
 arenita këni ÿana eni denitand

16 do eni dend:
 «Oko etëm endako eŋo! Oko etëm endako eŋo!
 Babilon, angol apangak aŋ, angol atëm aŋ
 and bax šudand banjëm band xaf-xaf do gë
 bambarax aŋ
 angol and bax ÿaŋënarand gë kaŋe,
 gë oxaŷ oyekax do gë oyeri aŋ!

17 Apëxëd amat fo xucak, napul ir go in nemik!»
 Dek bëhëreli bër okulun bën, dek bër këbi
 wëlarand okulun bën, gë bër kë riyeŋind gë

okuluŋ bën, do gë dëk bër kē riyenind gër
angwëngw bën xwëšara kēni nacët ako.

¹⁸ Axeÿ bani xeÿënd ga wat kēni okwëcën ond
amëra oŋ. Are bani rend: «Angol and fe wa hi
bax ang angol atēm aŋo?»

¹⁹ Afanaya bani fanayand gë obar ok gër ogaf
ga kēni ses do ga kēni renita mondako:

«Oko etēm endako eŋo! Oko etēm endako eŋo!
Angol atēm apangak and šotëraxën kēno napul
xali beta kēni dëk bër gë okuluŋ od gër
angwëngw bën,

apëxëd amat fo xucak, ata hik ang ladawe fo!

²⁰ Wën bër gër orën bën nëngandëralëŋun
gayik angol aŋo anëka yëcarëk!

Bëte wën bëwënëk bën, nëngandëralëŋun
gë oparëxanda ok, do gë bëlaŵënel bën

gayik Kaxanu xitik angol aŋo
në end ga narëndëra këŋun!»

²¹ Ata meleka ifangak wëd ko angaÿ atibax
and wëndër bax gë angaÿ and kēni ñoxixënënd
eyamb, do ga lap ko polo gër angwëngw, re ko:

«Wëj angol atēm and Babilon aŋo,
akëlëbëd amat fo kēni lap mondako,

bëtëdin ala axi wat na.

²² Na gër ndey, bët din ala aŋi wël na bësëmb
bër bemangi, gë bëyul,

gë bëfarix bër bacëroti ba okerelonŋ.

Na gër ndey, ari ar bëÿ axo gi na,

bëte din na gër ndey ekëbër ed aŋoxixën and
eyamb ax wëli na.

²³ Na gër ndey, bëte din angoben and lambo ax
wati na,

ofëna or ekana ax gi na.

Bëfandëran bërey bën hi bax bër banëbi
 êkwënd gër ed ex yo gër ebar ro
 do wëj bayëbi yifand ðek benëng bend bela bej
 gë obanji orey inj.

²⁴ Ata ðek bejo ki ñatënëgu gayik oşat or
 bëlaŵënel bër Kaxanu oñ watik gër ndey, oşat
 or bëwënëk oñ, do gë oşat or ðek bër lawëra
 kënebi gër ebar ro oñ.»

19

End eduwana ed gër orën enj

¹ Ga xucak eno, wël këmeni amëxwër atëm
 and bela yañ gër orën ga këni xey:

«Aleluya! Apexa añ, gë enjaran enj do gë panga
 inj,

Kaxanu, Axwën arebi an xwënëk!

² Kiti indexëm inj ðal ex do ind şenene ex
 gayikako axiti xiti këbi Bëbabilon bëyacaxik bër
 bax buyarënënd ebar gë eñac endebën
 bën.

Aŵaşa ŵaşa këbi gayik bën lawë këbi bëriyenin
 bërexëm bën.»

³ Ata xey këni bëte akinëm:

«Aleluya!

Okwëcën ond amëra and Babilon oñ,

din ir din kë şëni!»

⁴ Bëxarëk alapem gë bënax bën do gë
 bebëbëngw bebëbëngw bën foxi këni gër lëngw ir
 Kaxanu, mëñ ar ex gër añëpara and owun do
 këni rend:

«Amen! Aleluya!»

⁵ Ata ga wëlik oniŵ gër añëpara and owun, kë
 rend:

«Duwayino Kaxanu, mēŋ ar xwën këbo an,
wën ðek bër gapak bën do gë bërëtoc bën,
wën bëriyenin bërexëm bër këŋo fëbënd bën.»

⁶ Ata wël këme ang epuli ed bëla bëranjëm fo,
ang oŷëm fo do ang oxëbër osëm or ekëman fo
ga këni re:

«Aleluya! Gayikwa Kaxanu Axwën, arebi an,
mēŋ ar xorëk beŷ ðek an anëka wun ko.

⁷ Nëngandëralebo, patëlebo gër ecëkw edexëm,
Gayikwa ñambëran ind ekana ir anofo in
ñatëguk,

alindaŵ anëka ko ñatëgund.

⁸ Ayël yël bano exo cuda banjëm band xaf-xaf,
apeşax labëraw këno, bamënëk, band jing-jing.»

(Banjëm baŋo ŵacayak
or şenene or bëwënëk ol.)

⁹ Meleka in fel ke: «Ñëgwël: “Nëngandëralebi
bër ŵac kënebi gër ñambëran ind ekana ed
anofo bën!”»

Re ko bëte: «Bend këme rend beŋo ex eyeyan
ed ðal ed Kaxanu el.»

¹⁰ Ata foxi këme gër osapar orexëm mo
calexën. Bari mēŋ re ko: «Tëbël ðe, ax gi ex
na mondako! Wëno ariyenin fo hi këme ang hi
kën wëj do gë bëmaŷe bëndey bënd kë reyarand
end Yesu Kërisët bëŋ. Poxiyind eyo cale Kaxanu
gabat! Gayikwa osede or Yesu Kërisët ol ex er
këni reyarand bëlaŵënel bën.»

End fanac ifeşax eŋ

¹¹ Ata wat këme fol orën ol do fanac ifeşax ga
şanayaw ko. Ar ŷëpaxën baŋo an bano ŵacënd

«Ar mokwëta», do «Ar dal», gayik mën̄ kē xitind do kē wërënd gē or ſenene ol.

¹² Bangës bandexëm ban̄ warëk ang xodux fo, do ſëxwa ko oxamote or owun oranjëm. Yëgw këni gër ndexëm oŵac or ala ax nang ex na, angëmëne ax gi ex na mën̄ gabat.

¹³ Do ſuda ko acud and yëmb bani nē oſat. Oŵac orexëm ol ex: «Eyeyan ed Kaxanu el.»

¹⁴ Benga bend ocoroda bend gër orën beŋ, ſudara këni banjëm band xaf-xaf, bamënëk, bapeſax, do këno ſëfarand moñëpa yaŋ nē opanac opeſax.

¹⁵ Gër etëy edexëm kē ſanënd duxuma iñakax ir këbi sawaxën benëng bend bela beŋ. Gē or gapak oſëm këbi xadac, do ebi bëñëra ang këni wëñënd reseŋ ak gër akaraxën andexëm. Ngoy iŋo ex amatinali and oxoŷ oſëm or Kaxanu, mën̄ ar xorëk beŷ dek aŋ.

¹⁶ Gër acud andexëm, do gër emef endexëm yëgw këni oŵac: «Emun end bemun», do «Axwën ar bëxwën.»

¹⁷ Ata wat këmo meleka ga xwëſa ko gër eñan. Ga këbi yeyaneli dek oſël or bax ſëgërand yaŋ gër orën ol, xeŷ ko: «Yowën, barërëgun gër ñambëran itëm ind Kaxanu!

¹⁸ Yowën enëbi yamb bemun beŋ, gē bemun bend ocoroda beŋ, gē bër fangak bën, gē opanac ok do gē bër yëpaxën babi bën, gē okadëp ok gē bër ax gi ex na okadëp bën, gē bër gapak bën do gē bërëtoc bën.»

¹⁹ Ata wat këmo emacar eŋ, bemun bend gër ebar beŋ do gē ocoroda odebën ok ga fedër këni

enëbi merelixën ar yëpa bax yaŋ gër fanac ifeşax an, do gë ocorofa odexëm ok.

²⁰ Sëra kënëbi emacar eŋ do gë alawënel anëgwëş ar bax rind becarax bend baŋi nambelind bër şot bax nanganëme ir emacar do bani foxind eni calend gër eñaŋ end edaş edexëm bën. Tak bëxi lap kënëbi bëbëngw gër anjer and xodux, gër ed fëtëk mungu.

²¹ Bër bayik bën laŵëra këbi duxuma ir bax şanënd gër etëy ed ar yëpa bax yaŋ gër fanac an. Do dek oşel ol wëndëra këni ga yamb këni beman bendebën beŋ.

20

End bëniy wëli eŋ

¹ Ata wat këmo meleka ga ko fedaw gër orën ga lëkaya ko acoketaya and ambëxw atiŵax aŋ, do gë gweyele-gweyele isëm.

² Na sëra këŋo fato in, andën akarëk and këno ŵacënd şabucara, do Sindan aŋ. Fok këŋo gë gweyele-gweyele in xali ex kuca bëniy wëli.

³ Yëkëtëx këŋo polo gër ambëxw atiŵax, sënd ko do şëban ko etëndët el, exo tebaxën enambeli ed benëng bend bela el xali ex tək bëniy wëli. Do and kë xuca bëniy wëli aŋ, eno tebët ipëxëd.

⁴ Ata wat këme bañëpara band owun. Bër yëparaxën bax bën şot këni or gapak or enëbi kitixënënd bela ol. Wat këme bëte benjëw bend bër şësëk ga fodëtën kënëbi ogaf odebën gë ecëngwa bën, në end ga bani reyarand osede or Yesu, do bani femërand eyeyan ed Kaxanu eŋ. Bën ani poxi bana gër lëngw ir emacar, do gër

lëngw ir edaê ed w̃atinali bano el. Bën ani ma bana enëbi din nanganëme irexëm in ax gi ex na gër eyiỹ, ax gi ex na gër ataxan. Bën xani bax gër ecës, bakaw këni gër aniyani eni munaxën andamat gë Yesu Kërisët xali bënny wëli.

⁵ Bëšësëk bëšëxe bën ani kanira bana gër ecës xali xucak bënny wëli bën.

Ekani ed gër ecës eñanar el ex.

⁶ Awa nëngandëraleño, do gilexo awënëk ar hik šëf gër bër xanik añanar gër ecës an. Ata bën ecës ekinëm el ojaw̃ ax cot ex na gër ola orebën. Barikan ariyenin këno ýana eno diyeninënd Kaxanu do gë Kërisët ang bëšadaxan fo do eni mun gë mën gë bënny wëli.

⁷ And kë xuca bënny wëli aň, Sindan in asebet këno sebët exo canëgu gër epëra edexëm.

⁸ Ašanëgu ko šanëgu ebi nambelixën benëng bend bela bën ang lëgëra këni gër owebët onax or ebar ak. Benëng beño exëni Gog do gë Magog. Bën kë barërëgu gër emer do eni nëm̃b ang edini ed gër angwëngw fo.

⁹ Ata wat këmëni ga šan këni do beñëtar këni dek ebar el. Xul kënebi bëwënëk bën gër ed barër këni do gër angol and ex pëlot gër yomb ir Kaxanu aň. Barikan fedawëk na xodux elod gër örën do bëlën këbi.

¹⁰ Šabucara in, mën ar babi nambelind an, ýad këno, do lap këno gër anjer and xodux, gër ed fëtëk mungu, gër ed lap kënebi emacar eň, do gë alawënënel anëgwëš an. Mondako këni ýana eni torond ciš wec polo na din ir din.

End kiti ifelatar eň

¹¹ Ga xucak eno, wat këme añëpara and owun atëm apeşax do wat këmo bëte ar yëpak gër añëpara and owun aņo an. Ebar el do gë orën ol şapërek xali bebët abi bayi bana.

¹² Aņo wat këmeni bëshësək bën, bëjo bër gapak, bëjo bërëtoc, ga xwêşara këni gër lëngw ir añëpara and owun. Ar yëpak gër añëpara and owun an ko labëtërand bakayëta, do gë akayëta acëxe, and anıyan aņ. Xiti këbi bëshësək bën, ang yëgw këni gër bakayëta baņo ak, ang ebax bandixa bandebën ak.

¹³ Angwëngw aņ şepëtëgu këbi bëshësək bër hi bax polo bën. Ecës el do gë wur ir bëshësək in nęcëtëgu kënëbi bëshësək bër lëkaya banëbi bën do ala kala xiti këno ang ebax bandixa bandexëm ak.

¹⁴ Ata ar yëpak gër añëpara and owun an, lap ko ecës el do gë wur ir bëshësək in, gër anjer and xodux. Anjer and xodux aņo ex ecës ekinëm el.

¹⁵ Lap këņo bëte bëngënj gër anjer and xodux ar bayik yo oŵac orexëm ani ñëgw bana gër akayëta and anıyan.

21

End orën oxaşax do gë ebar ekaşax en

¹ Ata wat këme orën oxaşax do gë ebar ekaşax. Gayikwa orën oxarëk ol do gë ebar ekarëk el ayëcar yëcar bax, do angwëngw aņ ax bo bana.

² Wat këme bëte angol amënëk aņ ga kë şëlaw elod gër orën ga xaniwëk gër Kaxanu. Angol aņo ex Yerusalem ixaşax in do ang endënaŵ end eñër

end ÿañënarak exo ñataxënd gër icën indexëm fo hi bax.

³ Wël këme oniw̃ or ar ÿëpak gër añëpara and owun ol ga ko xeỹ:

«Edëg ed Kaxanu el anëka hik mërëxand ir bëla! Kaxanu wa bar këni edëg el gë bëla bën, bën eni gi bulunda irexëm do mëñ exo gi Kaxanu irebën.

⁴ Afëxwëc ko fëxwëc ðek ongwën ond gër ßangës ßandëbën oñ, ecës ax bo na, otes ax bo na, edenitan ax bo na, ayambën ax bo na.

Gayikwa bënd aniyän añanar beñ ax bo ex na.»

⁵ Ata re ko ar ÿëpak gër añëpara and owun an: «Gërëgako beỹ bën ðek këme nëngwët ex gi bëbëxaşax.» Re ko bëte: «Awa ñëgwël beño gayik enimin bënd mokwëta dëñ ex.»

⁶ Año re ko: «Anëka hik mondako! Wëno ex ayanar an, wëno ex afelatar an. Bëte wëno kë ÿanand, wëno fo kë ñatand. Ar sel këño an, arëmbënëgu këmo rëmbënëgu gër añësa and men ond kë yëlënd aniyän, axo yëc na monjëc.

⁷ Eño këmo yël ar kë xor an. Wëno Kaxanu këño xwën do mëñ exo gi asëñiwën.

⁸ Barikan bërëỹiyëk bën, gë bër gë oñëpëgënan bën, gë bër watak bëcusëşus bën, gë bëlaw̃ bër bëla bën, gë bër watak eñac bën, gë bëbanj bën, gë bër xwëtak olaş bën do gë ðek bënëgwëş bën, er fënan këmëni in ex anjer and xodfux do gë mungu. Ejo ex ecës ekinëm el.»

End Yerusalem ixaşax eñ

⁹ Ata gër omeleka ocongoki od ləkaya bax bandëmba banjongëbaki band yëm bax gë beñigënaxik benjongëbeki bepelatar beñ, ibat sëka ke exe pelëra. Ata re ko: «Yow mi masin endënaŵ end eñer eñ, alindaŵ ar anobo an.»

¹⁰ Meleka in wëla ke gë Angoc and Kaxanu añ bëte yañ në atënd acakax, do wësin ke angol amënëk añ, Yerusalem in, ga kē fedaw elod gër orën ga xaniwëk gër Kaxanu.

¹¹ Enjaran end Kaxanu eñ baño ñoband, do kē watind ang ekañ ekebenaxik, ekañ ed kēni wacënd šasëp, kal-kal ang anangoye fo.

¹² Amen and xecexën bani angol año añ, aýang ýang bax, bëte ašak šak bax. Owët epëxw gë oxi hi bax gër amen año do omeleka epëxw gë oki xwëšara bax gë ebët gë ebët. Do aýëgw ýëgw bani omac od bandëwëra epëxw gë baki band Bëyisërayel bañ gër ofëra or owët oño.

¹³ Er hi bax apën-eñan, owët osas, ambëng owët osas, ambëtëb owët osas, do acëla-eñan owët osas.

¹⁴ Er bay bani amen año gë orëda epëxw gë oxi do në ekëlan kala ýëgw bani owac obat or oparëxanda epëxw gë oki od anobo ok.

¹⁵ Ar baxe felërand an, esëyixën ləkaya baxo, ošët or kañe. Gë mën baxo sëyind angol añ, gë owët orexëm oñ, do gë amen and jey añ.

¹⁶ Angol añ er hi bax gë owebët onax od gwër fo gwër fo do acakëšak in gwër fo bax bëte gë aňangëýang in. Ata sëyi ko angol añ gë ošët orexëm ol do sëk ko: në ometër owëli epëxw gë oki.

¹⁷ Meleka in sëyi ko amen añ, ata sëk ko në

ometër ofëxw ocongebat gë oco, ang ebax osëyi or bela ak.

¹⁸ Amenj aŋ bay bani gë oxaỹ or ŝasëp, do angol aŋ hi bax kaŋe iwënëk, kal-kal ang anangoye amënëk fo.

¹⁹ Edëda ed amenj and angol aŋo el hi bax gë bapak epëxw gë baki, do ŷaŋën bani gë oxaỹ oxëbënaxik: apak aňanar aŋ gë ŝasëp, akinëm aŋ gë safir, atasën aŋ gë kalësedëwan, anaxën aŋ gë emërod,

²⁰ anjoxën aŋ gë onikës, anjongamatën aŋ gë sarëdëwan, anjongakinëm aŋ gë kërisolit, anjongatasën aŋ gë beril, anjonganaxën aŋ gë topas, andepëxwën aŋ gë kërisopëras, andepëxw gë amatën aŋ gë tirëkwas do andepëxw gë akinëm aŋ gë ametisët.

²¹ Ofëra epëxw gë oxi oŋ ebax becambas epëxw gë beki, epëra kala ecambas emat. Fëña isëm ir gër angol in ebax kaŋe iwënëk, kal-kal ang anangoye amënëk fo.

²² Aciwĩ and Kaxanu ame wat ex na gër angol aŋo. Gayikwa aciwĩ and Kaxanu aŋ hi këni Axwën Kaxanu, mëŋ ar xorëk beỹ dek an do gë anofo aŋ.

²³ Angol aŋo eňan këm do facawĩ këm ex gayik enjaran end Kaxanu eŋ këŋo fioband do anofo aŋ ex lambo irexëm in.

²⁴ Benëng bënd bela beŋ aliya këni ŷana eni dīyand gër angoben andexëm, do bemun bënd gër ebar beŋ eno mëlanëgund enjaran endebën eŋ.

²⁵ Owët or angol oŋ përarëxe kë ŷana ex bayind. Ado dëŋ ala ax përa na gayik gëmëd ax

gi na.

²⁶ Benëng bend bela beŋ aŵëlanëgu këno ÿana eno mëlanëgund enjaran endebën eŋ, do gë owun orebën ol.

²⁷ Barikan, ebuyaraxik gebatak ax dîl na gër angol aŋo. Ar watak becusëşus, ba enëgŵëş axo dîl na. Afo bër ÿëgwën kënebi omac odebën gër akayëta and aniyän and anofo bën fo kë lil.

22

End arayen eŋ

¹ Ata meleka in ŵasin ke yeß ir men ond kë yëlënd aniyän in. Men oŋo omënëk ebax kal-kal ang anangoye fo. Afes bax fesënd elod gër añëpara and owun or Kaxanu do gër and anofo aŋ.

² Wat këme mërëxand ir fëña isëm ir angol aŋo do gër obëŋa oki od yeß, atëx and gë odëwërëwën od kë yëlënd aniyän ok. Atëx aŋo, facaw ir ex yo kë rëwënd, mëne ngëŋ epëxw gë baki gër iniy. Opat odexëm ok këbi fakënënd benëng bend bela beŋ.

³ Eñëŋënaŋ ax bo na. Añëpara and owun or Kaxanu aŋ do gë and anofo aŋ kë hi mërëxand gër angol. Bëriyenin bërexëm bën këŋo ÿana eŋo calend.

⁴ Awat këni ÿana eni watënd dëxas irexëm in, do oŵac orexëm ol exo ñëgw gër oyiŷ orebën.

⁵ Ecamëdan ax bo na, do ala ax ñana na ex caland lambo, ala ax ñana na ex caland angoben and eñan gayik Axwën Kaxanu këbi ÿana ebi ŋoßand. Ata eni mun din ir din.

End omakaw ond Yesu enj

⁶ Ata re ko meleka in: «Bend këmi felënd beŋo eyeyan ed ðal, ed mokwëta ex. Axwën Kaxanu, mëŋ ar këbi yëlënd Angoc andexëm bëlaŵënel an, laŵëneŋu këŋo meleka irexëm in ebi masindëra bëriyenin bërexëm bën bend kë ñatëgu gogo beŋ.»

⁷ Ga re ko Axwën an: «Gogo këme yeli. Nëngandëraleŋo ar kë sëfënd ang rek gër akayëta aŋo ro ak, akayëta and kë nangënënd gana-gana fo er kë yelind aŋ!»

⁸ Wëno Şaŋ wëlëk do watëk beŋo. And wël këme do wat këme aŋ, foxi këme gër osapar mo cale meleka ir baxe wăsinëndërand beŋo in.

⁹ Barikan mëŋ re ko: «Tebël ðe, ax gi ex na mondako! Wëno ariyenin fo hi këme ang hi kën wëj do gë bëmaŷe bëndey bënd ex bëlaŵënel bën, do gë ðek bër kë balëkënalind bend gër akayëta aŋo ro bën. Poxiyind eyo cale Kaxanu gabat!»

¹⁰ Ata re ko: «Kërey con na bend yëgw këni gër akayëta aŋo ro beŋ. Akayëta aŋo kë nangënënd gana-gana fo er kë yowënd in, gayikwa ðam ex ex ŋatëgu.»

¹¹ Ar sëmbak an, kemënalexo kaş-kaş gër osëmbak orexëm, ar buyarëk an, kemënalexo exo buyar kaş-kaş. Ar şenene an kemëlanelexo, nëmëc gër or şenene orexëm, do ar wënëk an kemënalexo exo men nëmëc!

¹² Gogo këme yeli do me mëlali acosa aŋ, ala kala mo cos er riyeni ko in.

13 Wëno ex aŷanar an bëte wëno fo ex afelatar an. Wëno kë ŷanand bëte wëno fo kë ñatand*.

14 Nëngandëralebi bër kë nebënd banjëm bandebën baŷ ebi ñapaxën eyamb ed atëx and kë yëlënd aniyän el do eni dñlaxën gër owët or gër angol!

15 Barikan canëlexëni fac bër ex ang oďañët bën, gë bëbanj bën, gë bëŷacaxik bën, gë bëlaŵ bër bela bën, gë bër xwëtak olaš bën, do gë bër ñanëk do wër këbi enëgwëš bën!

16 Wëno Yesu lawënëli këŷo meleka iram in exo deya osede oram ol gër bamara. Wëno ex arandëwëra and Dafid an, wëno ex emal ed kë ñoband oxeya el.

17 Angoc and Kaxanu aŷ, do gë alindaŵ ar anofo an këni rend: «Yow!» Do ar wël këbi an delexo: «Yow!» Ar sel këŷo an, təkawëlexo. Ar ŷandi këŷo an, dëmbëlexo men ond kë yëlënd aniyän oŷ, men ond ayël fo oŷ.

Eŷata el

18 Wëno Šaŷ, gë obal osëm këme reyand gër ar kë wël yo eyeyan ed bënd bebër kë yowënd ecan ecan do ŷëgw këni gër akayëta aŷo beŷ: ar kë baš ŷeyë an, Kaxanu eŷo baš beñigëanaxik bënd ŷëgw këni gër akayëta aŷo beŷ.

19 Do ar kë bašëta ŷeyë gër eyeyan ed gër akayëta aŷo an, Kaxanu abasëta ko bašëta bëte ošet orexëm or atëx and kë yëlënd aniyän ol, do gë ošet or angol amënek or ŷëgw këni gër akayëta aŷo ol.

* **22:13 22.13** Gër Gërek er ŷëgw këni: «Alëfa» do gë «Omega», iñëgw iñanar iŷ do gë ipelatar iŷ.

²⁰ Ar ex sede ir bend dal bejo an kë reyand:
«Iyo, gogo këme yeli! Amen! Yow Axwën Yesu!»

²¹ Awa Axwën Yesu yëlëlenun wën dek oyekax
orexëm ol!

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: Oniyan

Contributor: Wycliffe Bible Translators, Inc.

All rights reserved.

2025-04-29

PDF generated using Haiola and XeLaTeX on 29 Apr 2025 from source
files dated 29 Apr 2025

8b7902f3-5e35-5b89-86b2-c6da1be458b9